

東
華
續
錄

東華續錄

十七

臣周澗蕃恭校

乾隆三十三年戊子春正月辛卯明瑞奏自大疊江進兵於十一月二十七日勦殺賊匪五百餘人次日遇伏復殺賊四十餘人生擒四人二十九日兵抵蠻結賊由密林內突出我兵盡力勦殺賊匪敗回斃賊二百餘人臣親登山瞭望見賊匪甚多所設十六寨俱屬險要密林之內隱約見有埋伏又見排有象陣不但山勢險峻兼深林密箐並無可通之路設法挑誘終不出戰因與諸大臣各侍衛官員商議先破其中堅餘寨自不能據守於十二月初二日分隊前進時值大霧我兵衝擊木寨賊匪施放槍礮臣等俱在兵弁前首先追擊人人奮勇用槍刀砍傷象隻象卽倒奔衝突賊

匪不支紛紛敗竄我兵衝冒槍礮盡力攻擊甚至彼此抱持以手相搏賊人不及施放槍礮但隔木寨用槍刀砍戳並拋擲火毬我兵力戰不退奮身直入木寨先係扎拉豐阿攻得一處臣明瑞續攻得一處觀音保亦攻得一處至晚賊復來奪我兵奮力擊殺相持至二更時所有埋伏賊人及他處防守各匪俱棄寨奔逸我兵進勦搜拏地方俱已廓清計殺賊二千餘人報聞又奏此次攻奪木寨臣審度情形不得不身先行列不意臨陣時右眼眶被有槍傷臣毫無困乏惟稍覺頭暈看字費力以致奏報稍遲伏思統領戎務不應輕身冒險請交部議罪以爲領兵重臣不能持重者戒得旨何忍治卿之罪以後稍爲留意可耳又奏臣由蠻結進兵行至隔弄山相近天生橋渡口係有名險隘聞從前鬼家部落宮裏雁曾將數百名堅守此地緬匪數萬皆不能過臣因遣官兵偵視

據稱天生橋乃隔弄山中斷之處下有河一道其勢險急兩岸石峰高出二三里峰上盤曲小徑止容一人行坐其橋係天生一片大石賊人將兩旁舊有幫植大木俱行拔毀不但乘騎不能過渡卽步行亦難詢之通事民人馬必興告稱往北有小路可以繞過遂令達興阿帶兵二千名仍留大路作奮取渡口之勢臣等帶兵進至河水發源處水雖不深而湍流甚急臣等催僱兵丁於十二月初十日俱行渡河先將山梁占據是日拏獲三賊訊稱賊眾以大兵但知大路是以加緊防守至此地水源渡口雖立兩木柵尙未撥人看守忽聞大兵已渡賊各驚惶逃赴宋賽等語臣等已過奇險之地惟有協力勦賊以成大功報聞○王辰諭據明瑞奏報見在進勦緬夷已過蠻結地方官兵奮勇攻擊連破賊壘十六座殺賊二千有餘賊匪喪膽竄逸等語明瑞秉性純誠才優幹濟前

者西陲之役每身先士卒效績宣猷昨歲自伊犁來京陛見方值
緬酋滋事前督臣調度失宜因令節制雲貴並授爲將軍領兵進
剿自任事以來凡辦理軍營諸務均能悉心籌畫動合機宜近自
木邦整隊深入於曰小地方統眾毀柵今行次壘結復親冒矢石
殲賊因糧摧堅陷銳以致目受槍傷猶鼓勇直前克揚我武自此
酋眾望風驚潰剋日直搗賊巢佇聞捷奏朕心深爲嘉慰明瑞見
在所襲之公係承恩世爵今既屢著殊績自應特沛恩施用示優
異明瑞著授爲一等誠嘉毅勇公賞給黃帶子紅寶石頂四團龍
補服服用所有原襲承恩公著伊弟奎林承襲並將原摺鈔發俾
中外知之○諭軍機大臣等據額勒登額奏稱帶兵圍攻老官屯
木城賊人死守不出孟連壩蘇帕等處賊匪若在旱塔馬脖子要
隘處所紮寨必致分我兵勢因移兵旱塔擊退襲後賊匪賊皆藏

匿木城因馬勝子山不可令賊占據先派綠營兵三百沙練兵三百至馬勝子山於通新街銅壁鐵壁等關各要隘建立卡座令可固守復調取虎踞關杉木籠等處兵丁如此數處兵少另於騰越永昌酌量添撥已移咨鄂甯等語額勒登額此奏甚不明晰伊等或仍由老官屯一路前進或由別路前進並未明白陳奏儻仍欲由老官屯進兵見賊固守不出伊等已撤兵在旱塔駐守如何能進儻欲由別路進兵伊等並未籌及可以進兵之路惟思在旱塔馬勝子山固守豈有固守即能勦賊之理額勒登額等前往老官屯惟欲攻賊木城曠日持久徒勞兵力已屬無能今尙不另籌破賊之計更屬錯謬著傳諭額勒登額如勦辦賊匪已過老官屯即整頓兵威由猛密一路直抵阿瓦城儻尙在旱塔駐守即捨老官屯帶兵探聽明瑞一路接應前進再據奏稱有上年投誠賞以六

品頂帶之擺夷頭人遍觀猛帶兵三百名來營效力等語此等擺夷宜多爲招撫安插軍行所過就各村莊覓購糧石甚有裨益若查明並非土司擺夷卽係緬匪種類沿途勦辦既可多得糧石復省內地解運之煩額勒登額等宜盡心籌辦並傳諭明瑞知之○戊戌諭軍機大臣等據額勒登額奏稱伊等退至旱塔後賊入潛出於林箐深處紮大寨七八座施放槍礮固守不戰等語額勒登額等初至老官屯若果身先士卒攻取木城則老官屯得之已久旣稱誘賊勦辦而賊出復不能勦反致賊人乘隙紮寨伊等並未設計討賊其先奏身先士卒攻取木城等語皆不可信明係退回旱塔觀望而已著傳諭明瑞令伊於破阿瓦城後將額勒登額等所奏進兵情形及帶兵奮勉虛實之處留心詳查據實具奏不可稍存姑息瞻徇之意○己亥 御批歷代通鑑輯覽成 御製序

曰編年之書莫備於 皇祖御批之資治通鑑綱目蓋是書集三編爲一部自三皇以至元末明初振綱挈目謹予嚴奪足以昭萬世法戒爲人君者不可不日手其帙而心其義也然 皇祖雖嘗挾精微微辭旨著論百餘首亦惟析疑正陋垂教後世耳於其書則一仍厥舊無所筆削也故全書篇幅雖多而議論乃什倍於事實卽如前編之中總論史論音釋辨疑考證紛不一家正編之中凡例發明書法考異集覽考證正誤質實濶益甚至於續編之作成於有明諸臣其時周禮沿尹起莘例作發明而廣義則出於張時泰效劉友益書法而爲之者夫發明書法其於歷朝興革正統偏安之際已不能得執中之論而况效而爲之者哉且以本朝之臣而紀其開國之事自不能不右本朝而左勝國此亦理之常也况三編中嬗代崛起之際稱太祖而繫以我者不一而足亦非

體例也故命儒臣纂歷代通鑑輯覽一書盡去歷朝臣各私其君之習而歸之正自隆古以至本朝四千五百五十九年事實編爲一部全書於凡正統偏安天命人心繫屬存亡必公必平惟嚴惟謹而無所容心曲徇於其閒觀是書者懷天命之無常知統系之應守則所以教萬世之爲君者卽所以教萬世之爲臣者也書中批論一依 皇祖之例自述所見據事以書者十之三儒臣擬批者十之七而經筆削塗乙者七之五卽用其語弗點竄者亦七之二云○庚子李清時卒調彰寶爲山東巡撫以蘇爾德爲山西巡撫調胡文伯爲江蘇布政使以歐陽永琦爲廣東布政使由浙江按察使遷○辛丑諭軍機大臣等據鄂甯奏查看額勒登額軍營情形及籌辦普洱邊境二摺其意專在各處分兵防守甚屬錯謬已於摺內詳悉批飭此次用兵原爲直搗賊巢勦擒酋首以伸國威而靖

邊徼見在我軍深入如已攻得阿瓦則其餘零星賊黨勢成瓦解
方且逃竄不暇焉敢闖入邊界此理本屬易曉今鄂甯惟以撥兵
嚴防鐵壁虎踞等關爲計不但兵力徒分於事無益且沿邊一帶
千有餘里又安能處處分布周密如此措置則與楊應琚前此之
調度乖張又何以異且以此等防守兵力彙集繼進以助明瑞聲
援則我軍倍增壯盛賊益望風膽落可以迅奏膚功乃計不出此
但知職在守邊總總以備禦爲事竟不顧明瑞業已懸軍深入鄂
甯果能悉力伙助則明瑞功成之日鄂甯亦當並與酬庸儻明瑞
或以後無兵眾接應稍有貽誤則鄂甯不獨無顏見朕又安能以
防邊無失遂足保其首領乎至額勒登額等逗遛旱塔不進鄂甯
旣遣孫爾桂前往查探孫爾桂回至永昌自必將額勒登額等不
能振作情形詳悉告知鄂甯卽應將額勒登額譴五格遷延誤事

之處據實參奏何得轉據伊等之言分兵四出防堵况朕意鄂甯
聞額勒登額軍營信息必以伊等爲不足任大事方將自請前往
督辦庶不愧大學士鄂爾泰之子試問孫爾桂既可直抵旱塔一
路鄂甯又有何艱阻而憚於一行乎顧惟信庸懦無能幕賓之言
並不知事理之輕重且欲模稜了事大非朕委任之意亦殊玷其
家聲鄂甯著傳旨嚴行申飭然不可因有此旨倉忙前進反誤永
昌接應之事但將額勒登額軍營情形一切據實奏來或免罪譴
耳况已有旨令明瑞嚴查軍營眾人耳目將來班師豈能瞞朕並
將此傳諭珠魯訥知之○以曾曰理爲浙江按察使由江南河○
丁未諭閩浙總督蘇昌自簡任封疆以來老成謹恪宣力有年茲
以陛見來京患疾溘逝深爲憫惻所有應得卹典著該部察例具
奏尋予祭葬諡愨勤○諭將軍公明瑞見在自宋賽統兵進剿其

猛密一路參贊大臣雖已降旨令額勒登額補授但於督率調度未能勝任協辦大學士公阿里衮著前往雲南辦理軍營策應機宜卽授爲參贊大臣所有隨帶人員俱著一體馳驛○諭軍機大臣等據珠魯訥奏稱原任總兵索柱等防守錫箔橋有賊千餘拒戰二日被賊占據橋梁等語著傳諭額勒登額令其尋路速通大營信息沿途殲剿以期肅清道路爲將軍聲援至旱塔馬脖子等處皆係新得地方儻復被賊占據則我兩路大兵均難退出宜留雲南兵數千交譚五格防守額勒登額簡選貴州等處強壯綠營兵丁暨滿兵四五千名令滿兵在前遄發接應明瑞可也○以崔應階爲閩浙總督富尼漢爲福建巡撫陳輝祖爲安徽布政使

察使

○戊申諭軍機大臣等征勦緬匪與準夷回部情形不同準

夷生釁抗拒又偏近喀爾喀地方回眾則初爲準夷所困自我平

定伊犁釋放霍集占伊不感恩反行戕害使臣此皆不可寬貸者
是以朕決計勦滅專派大臣駐紮彈壓若緬甸係絕徼極邊部落
卽得其地斷無遣派大臣駐紮之理特以劉藻辦理不善楊應琚
又復貪功輕進使賊勢猖狂驟難結局朕始派將軍大臣分路進
討特欲揚天朝兵威使賊知懼並非必欲破阿瓦城也況緬地瘴
盛我兵雖勇止能臨陣奮勉賊若堅守不戰亦無用武之地今自
明瑞進兵以來連破堅寨想賊已經喪膽若果有畏懼情形理宜
酌量辦理不可拘泥必破阿瓦城如準夷回部之例也儻賊不知
懼竟有抗拒猖狂形狀則決不可輕恕○改江南武鄉試歸總督
考試○以瞿善爲安徽按察使由江甯鹽運道遷○己酉命直隸河南湖
北湖南貴州各撥銀十萬兩酌給幫貼夫馬民人並免雲南大兵
所過永昌府屬額賦其非經過地方亦免十分之五○雲南巡撫

鄂甯奏正月初八日參贊大臣珠魯訥八百里加緊奏摺到永昌並無文移及摺底寄臣臣卽將摺拆閱始知錫箔橋梁爲賊占據查該處爲將軍明瑞文報往來之路急須剋日奪回因思旱塔離木邦不過十餘站目今旱塔官兵不下八九千名旣爲緬賊據險固守不能前進似可留兵數千防守分兵數千星卽接應木邦尙爲捷近已札商額勒登額令其分別留防援應得旨所想亦是但有旨令額勒登額直進接應大軍不知此旨到否爾等再速爲酌量將摺拆閱句批是如此方爲知輕重可嘉之至緬賊據險固守句批此處額勒登額未奏明甚誤事矣又奏將軍明瑞已經深入雖疊結一捷賊已膽落餘匪根株未盡仍須痛勦滇省兵丁零星調撥恐難濟用臣已飛咨貴州撫提酌調官兵二千名以備遣撥得旨更好滇省兵丁皆遇敵卽遁實不可用矣餘有旨諭諭軍機

大臣等據鄂甯奏將旱塔兵丁分撥接應木邦等處一摺所見亦是已於摺內詳悉批諭矣但前此曾經傳諭額勒登額令其由猛密一帶接應大軍未知此時會否接到見在復諭額勒登額如尚未奉到進兵猛密之旨卽班兵回至木邦與珠魯訥妥協商酌或取道大山爲明瑞接應以壯軍威而通聲息鄂甯惟妥速探聽情形有應籌畫接應者卽上緊辦理總以速通明瑞信息爲要至該撫摺內稱旱塔官兵旣爲緬賊據險固守尙在相持不能前進等語此必孫爾桂前自軍營回時將所見情形告知該撫者可見該撫前此未嘗不知額勒登額逗遛情節乃該撫前摺並未詳悉入告殊非公忠大臣體國之意是以傳旨申飭今朕亦不復追究惟期妥籌速辦於事有濟軍務告竣之日功罪亦自無難定論也此時惟以妥協辦理速得明瑞大軍消息爲要所得信息卽速奏聞

將此傳諭知之○庚戌諭額勒登額辦理諸事不善不勝參贊之任阿里衮到滇時可卽傳旨令額勒登額仍在領隊大臣上行走○壬子鄂甯奏正月初九日接統領木邦官兵普洱鎮總兵胡大猷稟稱正月初四日珠魯訥遣兵往護錫箔橋行五六十里卽聞橋已失總兵索柱參將王棟俱由干家寨撤兵回葫蘆口因聞賊匪分兩路來抄木邦見在俱回木邦保護同知陳元震知府郭鵬翀等俱於是日逃回永昌等語臣因事在緊急卽飛行額勒登額星夜帶兵赴援查木邦有兵有糧何至如此光景胡大猷稟內情節恐未必的確但珠魯訥不能撫輯招徠前將棄擲軍器就擒之四十餘人盡行斬戮以致匪眾無路可投鋌而走險至錫箔橋實爲要地乃毫無措置竟至不能抵禦種種不善實難辭咎總兵胡大猷於失橋時始帶兵前往及遇撤回之兵旣不能整頓戎行又

不能堵禦葫蘆隘口致木邦軍營張皇紊亂應請旨治罪再查木邦旱塔兩路軍營參贊止額勒登額一人仰懇簡派熟諳軍務曉暢戎行之大臣速赴軍營管理一切得旨已派阿里衮前往但恐路遠未能速至又批另有旨諭軍機大臣等鄂甯奏胡大猷稟報軍營情形一摺初疑木邦及沿途臺站或有賊匪猖獗及將全摺閱畢乃知胡大猷所稟悉屬訛傳誕謬遇事張皇卽如木邦裹帶糧石可至正月而又有滾運接濟之糧乃遽稱木邦見已無糧又陳元震懷印逃回等語尤荒唐不可信胡大猷身爲總兵大員統兵防守橋道遇賊不能奮擊輒爾率眾退回已屬罪無可追乃復敢捏飾虛辭驚惶妄稟搖惑軍心其情罪甚屬可惡見經降旨珠魯訥將伊革職拏解永昌俟解到之日著鄂甯嚴加刑訊究其捏詞誑報實出何心及得自何人傳播逐一研審明確卽於永昌

正法示眾以爲綠營怯懦虛誑者戒其布造謠言之人亦應查出從重治罪至額勒登額久駐旱塔逗撓貽誤殊屬不堪今已派阿里衮前往督率調度鄂甯此時一切總宜鎮靜以安眾心有應接濟策應者務上緊妥協辦理見在木邦情形若何並會否探有明瑞軍營信息及額勒登額領兵見至何處各情節速行詳晰具奏○甲寅諭向來各衙門保舉撫民同知通判例由吏部請旨特派大員考試第思此項人員原不過取其通曉字義標判文書而止並非場屋衡文可比若一一傳集校藝恐其中轉易滋代倩傳遞諸弊甚屬無謂嗣後各衙門保舉此項人員彙送吏部照月選官之例令其赴部親筆繕寫履歷以憑覈對不必另爲派員考試著爲令○乙卯諭軍機大臣等據鄂甯奏珠魯訥咨稱同知陳元震於珠魯訥出城禦賊時將參贊大臣印信及賞賜將軍荷包攜帶

潛逃知府郭鵬翀亦不知何往等語陳元震本係革職人員令在軍前隨參贊大臣辦事當此軍務緊要之時乃以看守印信等物輒行攜往潛逃而郭鵬翀以知府大員且專派支放糧石乃一同竄逸按其情罪重大幾與叛逆無異著鄂甯將陳元震郭鵬翀迅速拏至永昌嚴行訊鞫一俟審得實情著卽行凌遲處死所有伊等任所貲財一併嚴密查封並查二人之子隨任者著拏送刑部治罪至革職總兵胡大猷前經該撫以其謊報軍情摺參治罪當降旨令將胡大猷審明正法今據該撫查得賊匪實有圍擾木邦陳元震等潛逃之事則其所報尙非造言生事全無蹤影者可比該撫於審訊時如無別項情節惟坐以應得本條用昭平允至明瑞見在統兵采入看來一時尙未能剋日奏功見據鄂甯選派幹弁前往探信如此時軍務可竣自不必更爲措置若不能卽時嚴

事則俟回至木邦永昌等處時卽傳旨明瑞令其速行馳驛來京將該處形勢一切面爲陳奏商酌再定添兵事宜方爲妥協已傳諭調撥西安駐防馬三千匹荊州駐防馬二千匹解送滇省接應復令四川廣東廣西等省酌備壯健馬匹陸續解送約計可得一萬有餘京兵及索倫兵亦令挑撥七千名見酌量豫爲籌備此等兵馬沿途各該督撫已傳諭令其從容經理其到滇以後一應口糧草豆等項需用緊要尤宜先爲部署備將來不須應用臨時自可知會停止若俟明瑞進京後始行措辦恐已緩不及濟將此傳諭鄂甯酌量滇省情形悉心妥密籌辦仍一面卽速奏聞○丙辰旌十一世同居陝西汝陽縣民楊淙○戊午諭軍機大臣等據額勒登額奏稱接到鄂甯令伊往援木邦移文因各處要隘賊皆聚寨防守其勢日增若卽分兵從閒道前往計程雖近但路甚偏窄

不能乘騎宜暫收兵退至鐵壁關之隴川地方再派兵三千或臣
額勒登額或臣譚五格帶領急速往援俟至隴川相機籌辦等語
額勒登額此奏愈屬不堪木邦係將軍明瑞退兵要路將軍已經
深入若失木邦則退兵無路而珠魯訥所領者又係綠營無用之
兵額勒登額豈不知之既得鄂甯移咨反欲緩緩撤兵至隴川再
議是何言耶至譚五格專管綠營不能管轄滿兵使往援木邦但
令綠營前往然則額勒登額竟帶領滿兵在隴川坐守乎伊帶領
重兵安坐旱塔不能剿賊致賊多紮寨壘今尙言相機進剿無恥
之極朕數年來辦理準夷回部事宜信賞必罰毫無姑息額勒登
額豈不知之伊此時如已迅速接應木邦朕或另有辦理若仍在
隴川等處坐守恐伊不能保其首領也將此詳悉傳諭知之又諭
據鄂甯奏接到珠魯訥移咨正月初八初十等日與賊拒戰情形

珠魯訥帶領數千綠營無用之兵晝夜防守木邦未被賊占伊豈但無罪尙屬能辦事之人今鄂甯已派袁夢麟陳言志前往又令喬冲杓繼進珠魯訥此時協力夾攻必能勦賊著傳諭珠魯訥勿以木邦被圍將軍信息不通引罪自懼惟當加意防守俟援兵至時內外夾擊諸事熟籌辦理○吏部議准四川總督阿爾泰奏雅州府通判兼管雅關稅務查雅州道府知縣同城駐紮知縣儘可兼理稅務通判一缺應裁從之

二月壬戌諭軍機大臣等據鄂甯轉奏珠魯訥差人送到移咨據稱賊匪兩次約請楊重英議事因欲得將軍信息賞賊段匹賊復來請以賊詭詐未可深信斥逐而退等語賊匪遣人乞降自因明瑞追勦深入之故珠魯訥於賊叩請時卽令楊重英前往甚是但將急探將軍信息之意洩漏於賊已屬錯謬而賊再來時並未將

天朝兵力厚集之處明白宣諭僅僅斥逐尤爲失體著傳旨申飭
○鄂爾賽把總李進采等由木邦小路回至永昌臣細加詢問據
稱木邦大營五座木城木柵甚堅溝亦深闊營中牛馬甚多有米
一倉可支數十日緬匪於小河之南立營時來窺伺不敢逼近大
營等語查木邦營盤尙堅兵食未乏賊匪不敢逼近見在總兵喬
冲杓馳往並統領遊擊袁夢麟守備陳育志各兵飛往應援自可
由木邦洗勦深入接應將軍明瑞得旨何尙無勦賊之信總之緣
旗兵甚無用耳一得信息卽速奏報○癸亥 上御經筵○甲子
轉諾穆渾爲禮部左侍郎以德福爲禮部右侍郎由副都統遷○鄂爾
賽查此次大舉經將軍明瑞商定由猛密木邦兩路進勦至前途
會同以壯聲援乃額勒登額譚五格爲猛密一路統領久駐老官
屯旣不能攻破賊寨又不能繞道進取轉退回旱塔老師糜餉臣

因額勒登額久歷戎行退回旱塔必有長策乃名爲誘賊實未設
伏出奇反使賊匪得以連築木柵致明瑞大兵深入不能會合援
應賊匪得以要截木邦肆其猖獗道路阻梗大軍音信不通臣恐
他處檄調官兵緩不濟急隨將汛卡各兵盡數撥往並飛行額勒
登額等速爲援應伊等果具人心卽當速往剿逐接應明瑞大營
乃半月來經臣七次飛催尙未前抵木邦致臣遣去之遊擊袁夢
麟守備陳言志所帶兵八百餘名因無接應被賊衝散置將軍明
瑞於膜外坐失事機實屬罪不容誅應請旨將額勒登額譴五格
嚴加治罪以昭炯戒得旨有旨諭部又奏臣前與將軍明瑞熟商
大兵前進直搗賊巢賊匪自顧不暇必不能旁及是以將可用之
兵明瑞盡行帶往僅留一千數百名於杉木籠等處防禦永昌亦
止留數百以運軍糧而普洱一路又離阿瓦遼遠其餘皆懦弱之

兵未便前進致成鞭長莫及之勢得旨朕早知此事去歲朕及爾等皆失於輕敵然悔之於前不若慎之於後另行熟籌無不可成之事也又奏臣妄意額勒登額熟練戎行自必具有籌畫乃如此乖謬未早參奏應將臣交部治罪得旨朕謂此人不可獨當一面去歲已屢諭汝等豈今日事後之言乎爾等實應服朕將此與明瑞看目下汝所辦尙安此可寬矣又奏臣以我兵兩路深入賊匪必顧巢穴木邦駐兵數千已不爲少旁無可慮不意賊匪狡詐百端俟明瑞深入後復聚眾侵擾木邦得旨卽朕亦如此想此卽輕敵之處又豈料滇兵懦弱如此乎又奏珠魯訥不能先事豫防又不能奮勇攻殺以致賊匪四面猖獗援兵又緩不濟急得旨伊乃初次辦理軍情罪尙可寬非若額勒登額有心誤事又奏永昌爲各路總匯之地兵馬糧石均須豫籌臣是以未敢擅離見在軍務

緊急更須於永昌總爲料理未敢冒昧請往致有貽誤得旨汝此時豈可離永昌與前降旨時情形不同不去者正是若去更大不是矣○丙寅諭緬甸本南徼么膺久置化外原不足重煩天朝兵力卽與沿邊土司蠻觸相尋亦屬事所常有封疆大吏果能綏靖有方俾知懾我德威自可相安無事乃自愛必達吳達善等先後姑息因循不克示之節制遂致養癰貽患及劉藻以書生接任一聞與土境交訐無故自生惶擾旣以貽誤邊陲輕生殞命因令楊應琚往督滇省意其久稱厯練自可不動聲色示以創懲便可一舉集事詎伊始則意在招納投誠旋墮賊計一經棘手措置茫然復以病迷之際甘受人愚且不惜懷欺罔上乖張愐事更僕難言其實或稱莽匪或稱木匪究與緬酋是二是一且不能悉其種類何由責以奏功因將在事將領正其失律之誅以申軍紀而聲罪

之舉遂至勢難中輟其實朕於此等不足比數之小醜何嘗有必欲用兵之意卽至一誤再誤不得已命明瑞往蒞其事然啓行之前但授以總督並不冠以將軍之號本意固曉然可見中外臣民宜無不共知者從來重言用兵之人每云得其人不足臣得其地不足守若蠢茲緬匪並難齒於不足臣不足守之列而當新疆式關之後幅員二萬餘里若準夷回部莫不爲我臣僕又何有於彈丸僻處勝不爲武之緬匪乎卽在辦理西陲之始亦因車凌車凌烏巴什等請師問罪因爲命將申討其後逆回霍集占等復有負恩反噬之事是以馳我勝兵乘勢埽蕩蓋皆出於不得已並非有意武功今該酋憤駿始則侵擾土境繼乃抗拒顏行若不急加剿滅何以申國憲而輯邊隅惟是明瑞受任之日朕意輕量窮蹙謂其不值張皇措置惟簡派巴圖魯侍衛官兵百人並選健銳火器

二營勁旅三千以爲可備軍前調遣之用無如滇省綠營弁卒經楊應琚不善駕馭以致恇怯性成遇賊輒退不足充用而命往禁軍在在分資調撥未免不敷是朕之蔑視緬酋未爲深思遠計不得不引爲己過者然兵之強弱視將之能否如明瑞之殫誠勵眾行閒莫不自奮觀於日小之立毀木城蠻結之連拔十六寨如此陷銳摧堅卽綠營亦何嘗無感激效命之人哉其猛密一路明瑞初議額勒登額譚五格督領前進朕卽爲傳諭額勒登額止可供人驅使不能獨當一面而譚五格未經戰陣又係內務府微末出身器局本小不足以壓眾諄訓不啻再三軍機大臣聞之至熟後乃命額爾景額爲參贊以資調度詎伊病故之後二人果皆觀望不前而索柱等駐防天生橋錫箔江等處以已據之險亦皆棄而不守遂任擊敗餘賊潛行滋擾木邦設使去年卽用阿里衮分勦

猛密舒赫德鎮守木邦居中接應大功早已告成特以其事本屬不值大舉是以未經策遣今猛密旣已貽誤無從追悔見命阿里袞等赴滇整理戎行率兵繼進伊等身爲大臣自能和衷集事動出萬全至朕於臣工功罪一切各如其人所自取絲毫不存成見卽如明瑞晉加公爵厚加優賞緣前在西路軍營屢著勲績見又鼓勵將士督率有方是以特示優崇而鄂甯駐紮永昌籌辦軍儲等項頗屬盡心朕亦深爲嘉許若珠魯訥駐守木邦其權衡失當之處惟在妄誅降匪一節賊黨因生疑懼但此乃其限於才識所致論其悉力守禦與賊相持卽係任事出力之員並不加之責備惟額勒登額於接應將軍之事視同膜外及鄂甯調赴木邦策應七檄不行其意猶以株守旱塔於兵眾並無損失欲爲卸責之計其居心豈可復問譚五格雖較額勒登額情罪有閒而以提督領

兵之大員附和隨同推諉亦自有應得之罪總之軍行勸懲全在信賞必罰凡諸臣有心之惡與無心之過雖尋常辦理公務無不鑑空衡平諸王大臣固已共聞共見況在行師重寄尚可稍容畸重畸輕致乖馭眾之道乎明瑞見在沿途殲勦屢挫賊鋒兼之攻克猛弄搜獲糧石以濟儲精則雖懸軍深入後乏應援而士飽馬騰無虞匱竭是皆仰荷上天恩眷曲加護佑此後在事臣工自必益知奮勉共奏膚功以爲外夷敢抗天威者之炯戒所有用兵始末恐中外未能盡曉著將此通諭知之○諭軍機大臣等鄂爾泰額勒登額譚五格爲猛密一路官兵統領乃於老官屯久駐旣不能攻克賊柵轉行退回旱塔後令其前赴木邦珠魯訥軍營應援飛檄七次尙未往抵木邦坐失事機實爲罪不容誅等語前鄂爾泰孫爾桂往探情形摺內已批應將額勒登額等嚴行參奏今

直待奉到此旨始爲此奏辦理已在事後但額勒登額爲人止可供人驅策不能獨當一面譚五格局面甚小朕亦早已見及屢向明瑞降旨不必令其分統一路詎伊等自額爾景額病故之後遷延觀望種種坐失事機覈其情罪則額勒登額旣已畏葸貽誤復自以爲堅守不前弁兵並無損失尙欲藉此以爲無過可摘殊不思軍行何事如此視同膜外其心實不可問額勒登額已有旨拏解來京治罪至譚五格之罪較額勒登額之有心貽誤原屬有閒然以提督領兵亦富力爲奮勉乃竟因循推諉軍紀攸關自有應得之咎著諭令鄂爾知悉將伊一併革職拏解送京所有伊等任所貲財並著一併查抄朕於臣工功罪從不存絲毫成見有心之惡法在必懲如其事非才力所及偶致蹉跌而其過本不出於有意亦必深爲原諒珠魯訥之在木邦惟將沙練正法一節不免權

衡失當致匪徒懷疑滋事固不得爲無過但其兢兢固守能不改其本心何嘗過爲責備此卽其明驗也著將此旨亦令珠魯訥知之至鄂甯見在永昌料理一切軍務繁多所奏稱未敢輕往軍營致有貽誤所見允協已於摺內批示矣將此一併傳諭阿里衮鄂甯並珠魯訥知之又諭前經降旨命明瑞回至木邦卽來京面授機宜再行前往辦理迪勒事務計明瑞起身時阿里衮亦已到滇所有雲貴總督印務卽著阿里衮暫行署理留駐永昌鄂甯可將見辦軍營諸事交代暫回省城將地方應辦事件悉心料理卽如採買鼓鑄銅斤之類及一切吏治民務皆需該撫親行酌辦不能遠駐永昌分身兼顧俟明瑞自京回滇將屆進兵之期鄂甯再行前駐永昌照料一切至伊此時雖回省城專辦巡撫之事而軍行所需辦理諸務仍係鄂甯分內之責不特阿里衮暫署時不可膜

視卽明瑞回滇後一切仍當鄂甯力任不容稍諉也至鄂甯簡任巡撫未久此次辦理軍營諸事尙屬妥協以後務期益加奮勉以副委任將此諭令鄂甯並明瑞阿里袞知之總之爾三人合爲一人方於事有濟○諭見在降旨酌調吉林所屬熟悉水性兵一千名並福建水師三千名豫備分路會剿所需駕駛船隻此時卽應豫爲造辦庶免緩不及濟著傳諭鄂甯將一切需用物料迅卽購備齊全並知會楚省選撥熟習造船兵匠星卽赴滇辦理再上年明瑞摺奏於沿江將木柁順流飄下原因不用水師故作疑兵之意今趙辦船隻以利師行則不可先期洩漏致賊匪得爲豫備應於新街上游內地與賊人隔遠之處慎密妥協毋令竹頭木屑稍入江流使之猝不及防鄂甯可約計船隻足敷四千人之用止緊豫造完足以待冬初應用並將此諭令參贊大臣阿里袞知之尋

奏新街上游水路與內地相通者乃騰越州西南之銀江一帶水道紆回崇山屈曲舟楫不能通達其南甸所屬蓋西檳榔江直至壩尾二百餘里水深數尺數寸不等然均係砂石節節坎坷人力決難開鑿得旨旣如此則造船一事竟可不言矣○以明亮爲參贊大臣帶吉林兵赴雲南軍營○辛未 上啓鑾謁 泰陵○諭佛德前在京陛見因伊曾任永昌府知府詢以該處情形據稱木邦南境有茂隆銀廠凡行廠事件及廠委文稟俱由木邦等語當經傳旨訊問鄂甯則茂隆廠在木邦東南中阻一江彼此隔越並不毗連佛德所奏全屬舛謬因令明白回奏伊亦自知難以自解惟有請旨交部從重議處足見平日於地方諸事並不留心據實辦理雖在任有年而該處情形全然不知體察一經垂問輒爾冒昧陳奏此等隨口枝梧言之轉似鑿鑿有據深屬外官惡習佛德

著交部嚴加議處尋議上得旨佛德著降二級調用○鄂爾奏木
邦臺站被賊衝散將軍大兵在外急須援應額勒登額等擁兵不
進臣前後十次飛催置若罔聞茲於二月初一日據副將王振元
孫爾桂稟稱額勒登額譚五格因猛卯有賊衝出將滿漢官兵沙
練俱撤回蠻籠駐紮並撤虎踞鐵壁等關官兵同至蠻籠另候分
撥等語不勝駭異查蠻籠在隴川之內係內地土司地方額勒登
額等何以漸次退回內地即使猛卯有賊何難奮力勦逐乃退入
蠻籠離宛頂木邦一路更爲遙遠臣飛行總兵喬冲杓帶兵星夜
前往通路接應將軍大兵額勒登額等可痛恨之處實難枚舉得
旨實實可恨又奏據木邦軍營之前鋒委署筆帖式官德東稱木
邦四面被賊圍困至正月十八日晚間將參贊珠魯訥中營圍住
五更時珠魯訥自盡身故等語查木邦旣已殘破急須整頓恢復

見將陸續調到之兵飛令前進其已調未到者催令隨到隨即撥往並覓素諳緬地道路之人給與清字書札令其探聽將軍明瑞大營投遞知會明瑞見在兩路光景酌量統兵回勦再圖進取得旨一得信息卽速具奏○癸酉諭軍機大臣等前因額勒登額帶兵至老官屯不能勦辦賊匪反移兵旱塔致賊乘隙紮立多寨仍不奮勉打仗安坐貽誤抄其家產時以伊所犯之罪尙不至連坐弟兄故止拏伊父子監禁伊弟隆安保家產仍行賞還今明瑞深入木邦復被賊圍鄂甯咨催十餘次伊並不急速援應帶兵退回蠻籠內地伊隊內有兵數千反調取孫爾桂之兵使棄要隘保護伊等情甚可惡著傳諭舒赫德仍將隆安保家產查抄並拏交刑部監禁○甲戌 上謁 泰陵回鑾○乙亥諭軍機大臣等雲南進勦緬匪一切調度軍行事務最關緊要江蘇巡撫明德久任封

疆且曾隨黃廷桂辦理軍需素稱幹練欲令前赴滇省經理兵馬糧餉諸事必得該撫卽速來京先行面授事宜方爲妥善見已降旨高晉令其赴蘇兼管撫篆明德著卽馳驛起程○鄂爾奏臣前聞額勒登額等退駐蠻籠之信飛飭孫爾桂等查探據孫爾桂稟稱賊近日潛伏猛卯之底麻江邊其邦中山並未見賊虎踞鐵壁關外之賊不知潛伏何處並未竄入旋據額勒登額譚五格札稱賊人將邦中山占踞龍江渡口亦被賊擾擬帶兵由猛岳小道前赴宛頂見今虎踞鐵壁猛卯各路探聽賊有數萬等語查額勒登額等與孫爾桂所言大相刺謬額勒登額等擁八九千有用之兵不能鼓勇勦賊以致銳氣消磨今又徘徊觀望不能速援本邦乃爲此驚惶失措之言必是豫爲欺罔張本實實可恨罪不容誅得旨竟誤事至此之極惟有速拏二人解京正法消恨耳又奏將軍

明瑞遣木邦擺夷線當弄線二人來內地投文臣面加詢問據稱該擺夷係木邦頭目線五格手下人隨將軍大營自木邦進兵一路俱獲全勝到宋養往前三站之寫哄地方糧食無可尋覓聞猛弄有糧故撤兵由猛弄一路剿殺打破夷寨得有糧石見在將軍又往勦大山大山土司辦糧數百石解送大營因賊人攔截尙未前進等語臣面加獎賞仍令該擺夷迅卽前往探聽得旨覽此則明瑞大軍自屬無妨直是額勒登額誤事不淺可恨可恨○丙子諭鄂爾齊奏報調度接應軍營情形各摺所見俱中窺要該撫自調任滇撫以來一切籌畫軍行具見實心經理於邊疆事宜毫無貽誤又能持以鎮靜並不稍涉張皇實不愧爲大學士鄂爾泰之子朕心深爲嘉許著加恩賞給內大臣銜並賞荷包四箇以示優眷○丁丑上還京師○諭巴圖濟爾噶勒領隊到雲南時著在參

贊大臣上行走○戊寅諭軍機大臣等據宋邦綬奏接准熊學鵬
咨稱浙江逆犯齊周華書內有已故謝濟世贈該犯添髯記序移
交查辦當卽委員嚴查伊家內並無此件原稿惟有所作梅莊雜
著一本中多乖謬怨恨之語見將伊子謝夢熊等研審究擬等語
謝濟世性情乖戾屢獲罪愆今閱雜著所籤各條誠不免語含怨
望使其尙在自當明正其罪以昭懲創但其人已物故多年自可
無庸復加審究惟伊所作書詞旣多謬妄不應復任存留該撫卽
飭令地方官將已刷之書及原刊板片盡行查出銷毀毋使稍有
疏漏著將此傳諭知之○庚辰 上至 甯壽宮視 溫惠皇貴
太妃疾○鄂甯奏二月十二日接效力原任建水州知州徐名道
稟稱差往大山投文之馬夫董上勳回到宛頂據稟伊同黨夷二
名自宛頂起身由暮董寒蓋小路到猛臘見將軍明瑞大營紮在

坡頂四圍賊紮營七座伊等住二日不能進去是以回來等語查
猛臘係猛育地方離宛頂不過八站而此入站董上勳等止兩三
日卽回至宛頂則取道甚易臣見飛行額勒登額喬冲杓等裹糧
速往援應得旨嘉獎又奏知府郭鵬翀同知陳元震等解至永昌
訊明恆怯鼠逸屬實遵旨將該二員極刑處死至吏目黃詔鳳係
派往辦事之員竟隨同逃匿亦應請旨正法其把總張傑不過在
營聽差陳元震旣假參贊之諭令伊護送印信該弁自不敢不遵
實非鼠逃尙可寬宥報聞○甲申鄂甯奏據總兵喬冲杓稟稱二
月十三日途遇總兵長青哈國興詢問將軍明瑞信息伊等不肯
細說徑馳往宛頂見額勒登額譚五格並有副參遊守滿漢兵丁
甚多俱隨二鎮赴宛頂等語查長青哈國興係隨將軍明瑞之員
今俱衝出必有他故額勒登額等前此已失機宜後由小隴川一

路紆遲將及一月始到宛頂且既知將軍大營所在又不卽日星馳前往致明瑞懸軍無援此時不知若何臣實痛心切骨擬俟阿里衮到滇卽傳旨將額勒登額革職拏解送京譚五格亦應請旨革職拏問得旨是○乙酉 上至 甯壽宮視 溫惠皇貴太妃疾○丙戌諭將軍公明瑞自疊結大破賊兵之後進至宋養因前路並無賊匪蹤迹而額勒登額等又不能從猛密取道會兵同進遂由猛弄一路破壘因糧屢有斬獲繼復由大山移駐小猛育數日間攻擊賊營連次取勝此時若額勒登額領兵由外進援腹背夾攻賊眾何難糜潰詎額勒登額始於旱塔逗遛老師挫銳迨退回虎踞關又因賊眾尾至猛卯一路轉避賊繞從內地由小隴川等處紆緩而行以數日可達之程遲至二十餘日方抵宛頂經鄂甯屢檄促援一切置之不問致老官屯賊眾轉得併力拒我大軍

是額勒登額喪盡天良有心貽誤其罪可勝誅乎時將軍公明瑞方統眾奮力勦禦以綠營兵丁疲病者多不忍拋棄遄行令將領等分整隊伍以次衝出明瑞親冒矢石督師殿後猶殺賊數千我軍藉以保護而明瑞悉力擊戰以致受傷身殞其相隨之都統扎拉豐阿護軍統領觀音保總兵李全亦先後陣亡聞之深爲軫悼在緬匪徼外么膺本不值興兵辦理朕並無必欲剿滅之意前降諭旨甚明特以劉藻楊應琚舛謬失律於前而額勒登額等喪心僨事又出意料之外致將軍大臣奮勇捐軀辦理勢難中止見已特派經略將軍參贊大臣並調撥八旗勁旅厚集繼進以期掃蕩蠻氛至明瑞等夙秉純誠盡心國事效命疆場並宜優加恩卹以慰忠靈明瑞著照班第之例從優議卹其一等誠嘉毅勇公卽著伊子承襲扎拉豐阿觀音保李全亦著一併優予卹典俱入祀昭

忠祠該部詳悉察例具奏所有陣亡兵丁並著行文該督等查明卹賞又諭見在續派官兵赴滇籌辦進剿緬匪一切機宜關緊緊要必須重臣前往督率調度以期迅奏膚功大學士忠勇公傅恆著授爲經略阿里袞阿桂著授爲副將軍舒赫德著授爲參贊大臣阿桂見已傳旨令其來京再赴滇省舒赫德卽行馳驛前往雲南與阿里袞鄂甯豫辦軍營事務傳恆俟將次進兵再行前往所有雲貴總督員缺卽著鄂甯補授明德著調補雲南巡撫明德未到之先其總督印務著阿里袞暫行管理鄂甯仍著辦理巡撫印務至隨舒赫德前往之司員等並著一併馳驛○諭額勒登額身爲參贊大臣統兵進剿乃有心退縮貽誤經撫臣屢調進援一切置之不問實爲罪不容誅見今降旨革職解來京治罪額勒登額本烏拉齊微末之人前此皆由富德袒庇戚誼多方緣飾疊次

保薦擢至大員派往軍營竟償軍旅大事從來外省濫舉匪人該督撫等尙有應得處分今額勒登額喪心失律至此非尋常敗檢劣員可比爲舉主者安得聽其置身事外以長朋比頽風富德著革去散秩大臣擊交刑部治罪○以福隆安爲兵部尙書軍機處行走由鑒儀衛掌衛事大臣還○熊學鵬丁憂以永德爲浙江巡撫劉純煒爲浙江布政使由杭嘉湖道遷○調彰寶爲江蘇巡撫富尼漢爲山東巡撫鄂寶爲福建巡撫以程燾爲湖北巡撫勒爾謹爲陝西布政使調尹嘉銓爲山東按察使以夔舒爲山西按察使原任雲南按察使○丁亥上親耕藉田○諭將軍公明瑞夙秉忠誠歷著勲績昨命統兵進剿緬匪明瑞身先士卒屢挫賊鋒乃以懸軍深入而額勒登額等有心逗遛後援不繼因於猛臘地方保護諸軍身留殿後衝冒矢石以致受傷身殞已降旨加恩優卹並入祀昭忠祠以酬忠盡

從前駐藏大臣傅清拉布敦鋤兇死事曾敕建雙忠祠秩在祀典茲明瑞勤事捐軀戰烈尤堪嘉尚著循前例於京師特建專祠舉行嚴祀其先後陣亡之都統扎拉豐阿護軍統領觀音保總兵李全王玉廷均予入祠從祀用慰忠魂所有應錫祠名及建祠事宜各衙門察例具奏尋建祠於地安門外賜名曰旌勇○諭侍郎珠魯訥以參贊大臣駐紮木邦策應軍營因索柱領兵赴天生橋遇賊退回並棄錫箔橋梁不守以致賊匪尾入滋擾木邦珠魯訥悉力拒守禦戰相持經十餘日尋以所統兵丁俱係綠營懦怯成習見旁近小營失火紛紛潰散珠魯訥獨力不支卽於營內自盡雖與臨陣捐軀者相去一閒其情亦屬可憫所有應行優卹之處該部察例具奏至總兵胡大猷前此不能堅守葫蘆隘口曾降旨革職今旣隨同珠魯訥堵禦賊匪陣亡前愆可無追論著加恩仍給

還總兵原銜以昭平允

尋予殊魯訥祭葬雲騎尉世職

○飭各省道府按部錄囚

三月己丑朔諭朕惟

關帝歷代尊崇遠經國朝尤昭靈貺前於

順治九年

敕封忠義神武關聖大帝至康熙雍正年間復晉爵

所生澤延世裔典禮備極優隆朕式展明禋以

神原諡壯繆未

孚定論爰飭禮官易諡神勇是皆考行定名俾彰義烈若夫靈威

默相屢荷嘉庥宜備懿稱益昭美報可加封

忠義神武靈佑關

聖大帝其官建祠宇秩在祀典者並依新號即敬謹設立

神牌

以申崇奉

○諭額勒登額獲罪甚大孥戮不足蔽辜著將額勒登

額之妻卽行發往伊犁賞給厄魯特爲奴○諭軍機大臣等征勦

緬匪今歲暫止進兵伊犁將軍阿桂可不必趨行前來著仍在伊

犁駐紮辦事候朕再行降旨阿桂旣不前來著伊勒圖仍在喀什

噶爾額敏和卓仍在葉爾羌辦事○以鄂忻爲工部侍郎

由副都統還

○庚寅以蔡鴻業爲甘肅布政使宋弼爲甘肅按察使

由肅州道進

○

辛卯以雲南民人辦運兵糧命再賞銀三十萬兩○壬辰諭軍機

大臣等吳紹詩奏查出李紱各集語多憤嫉請革去生前官秩並

將伊子孫革職解赴質審其李任漢傳占衡集內亦多狂悖不法

並將伊子孫查辦一摺所奏未免過當檢閱各籤如李紱所作詩

文其閒誠有牢騷已甚之辭但覈之多係標榜欺人惡習尙無悖

謬訛謗實蹟卽其與戴名世七夕同飲原在戴名世未經犯案以

前且坐中不止一人無足深究至李任漢之與呂留良語多推許

然其所指不過專爲講章時文而彼時該犯罪案亦未發覺初非

甘心附會逆惡若傳占衡狂吠之語其人生於明季濡染末流無

知妄作之風當時類此者恐不特傳占衡一人且其人均久經物

故子孫又閱世遼遠如一一根究滋擾蔓延於事體旣爲未協並

恐無識之流或疑其以文字獲罪轉得遂其詭激沽名之隱甚屬
無謂該撫所奏將李紱子孫革職審擬及查封家口房屋並查覈
李茹民馮詠馮謙萬承倉吳名圻黃石麟等之處一併無庸置議
但此等紕謬語言旣已刊刻成書儻仍聽其謬種流傳其於世道
人心貽誤不淺所有各項書本版片該撫可逐一查明卽行銷毀
毋令稍有留遺原摺並發還將此傳諭知之○甲午諭都統扎拉
豐阿護軍統領觀音保隨明瑞進剿緬匪勤事捐軀深堪嘉尙已
降旨兵部從優議卹若僅循例議給世職殊未副朕逾格酬庸之
意扎拉豐阿舊有承襲一等輕車都尉世職著加恩給予世襲男
爵觀音保舊有騎都尉世職著加恩給予世襲輕車都尉其總兵
李全著照王玉廷之例給予世襲騎都尉加一雲騎尉○己亥阿
里袞鄂爾奏昨奉旨令楊重英至京以備詢問查楊重英並未自

木邦出來嗣據伊家人朱貴到永昌稟稱正月十九日楊重英走離木邦至金塔緬寺地方遇賊截住楊重英拔刀衝突連馬跌入溝內被賊擒去等語查朱貴係楊重英家人且得之目擊自是實情得旨覽○辛丑諭前降旨將額勒登額之妻發遣伊犁乃額勒登額之叔上駟院侍衛佛爾賽膽敢將額勒登額之妻鳩死實屬目無法紀可惡之極著將佛爾賽拏交軍機大臣嚴審定擬佛爾賽之妻著發伊犁給厄魯特爲奴其子俱著拏交刑部監禁○壬寅 溫惠皇太貴妃薨○侍郎彭啓豐左副都御史呂熾以原品休致○以宋邦綏爲兵部侍郎由廣西巡撫遷○癸卯 上親奠 溫惠皇太貴妃○調夔舒爲湖北按察使朱珪爲山西按察使○乙巳調鄂寶爲廣西巡撫鍾音爲福建巡撫良卿爲廣東巡撫以錢度爲貴州巡撫宮兆麟爲雲南布政使由按察使遷○調圖桑阿爲江西

按察使吳虎炳爲廣西按察使○戊申以諾穆親爲雲南按察使

由鹽驛道遷

○己酉予明瑞諡果烈扎拉豐阿諡昭節觀音保李全祭

葬○癸丑阿里衮鄂甯奏虎踞關糧員張遐齡回至永昌該員係

隨額勒登額之員臣等因細詢額勒登額逗遛情形據稱額勒登
額等正月十七日到虎踞關住一日十九日抵遮坎又住六日二
十六日起行不遠即將營紮住二十七日由大隴川復回蠻籠二
十九日由杉木籠山至喇嘛住五日因連奉諭旨始於二月初四
日由喇嘛岔小隴川芒市赴宛頂到遮坎時糧員卽稟知離宛頂
甚近乃額勒登額先檄調二十日口糧又在喇嘛裹帶滿兵五日
緣營兵十日口糧先檄調軍裝馬一千匹又令騰越州買馬四五
百匹又檄取軍需銀二千兩無非藉以遷延之計且忽而撥兵鐵
壁關忽而撥兵邦中山忽而調兵堵禦南甸沙冲口到處停留延

緩其實自入虎踞關後沿途未遇一賊等語查遮坎距宛頂止三站額勒登額正月十九日已抵遮坎卽應順道星馳乃忽前忽卻有意耽延貽誤至於此極其心不可問罪不容誅臣等旣又查出情節自當據實續奏得旨實實可惡○甲寅諭鄂甯在滇已逾一載彼處情形自能諳悉且伊母年老鄂甯著來京省視其母俟朕面詢軍營一切情形後再行回任

夏四月己未諭軍機大臣等此時大臣陸續到滇省駐紮賊等畏懼遣人乞降亦未可定但賊等甚屬詭詐或係誠心乞降或係使人試探均宜詳察辦理將此傳諭舒赫德伊到彼時賊匪遣人乞降或其酋長親來或遣大頭人來時舒赫德代爲具奏請旨若僅遣微末頭人前來則不可信卽向伊等云爾等係慕爾小部敢與天朝抗拒情甚可惡斷難輕宥我今統兵將爾等盡行剿滅爾等

果自悔罪誠心乞降必得爾王親來或遣大頭人來我當代爲奏
懇大皇帝或憐爾愚蠢從寬末減亦未可定若但遣微末頭人來
不但不代爲具奏爾等所呈文書亦不拆看如此曉諭一面駁回
一面奏聞若乘賊等遣人乞降卽藉此苟且了事斷乎不可著傳
諭舒赫德會同阿里亥鄂爾達照辦理尋奏查此番額匪呈遞乞
降文書其大頭人一名未到僅交與被擒之兵丁帶呈其所呈文
書內復牽率土司擺夷爲辭看來仍屬藉此試探臣等商議不但
不代爲奏請亦不須給與回文但見在出來兵丁許爾功等云賊
匪自知罪重大頭人不敢卽來 大皇帝如肯恩准伊等投誠隨
後卽遣頭人呈進貢物表文等語是以本年暫不進兵且聽伊信
臣等道諭作擬較文呈覽其應如何之處出自睿裁得旨是少加
修飾但徑行發文前往反似先去催逼矣莫若權且不發俟伊著

急自必復遣人來○甲子諭鄂甯覆奏額勒登額退卻遷延喪心
貽誤所有奉到廷寄及清字奏摺並不告知譚五格一摺實出情
理之外深堪痛恨今日適當理事之期諸王大臣等俱在因將鄂
甯奏摺及朕去歲秋間極論額勒登額譚五格之不堪任事節經
傳諭案檔令眾閱看可知朕早已豫料及之矣進剿緬匪一事前
經劉藻楊應琚等種種措置乖方其勢出於不得不辦屢降諭旨
甚明至明瑞奉命往蒞其事一切經畫調度俱能勇往振作所至
致果克捷賊眾望風披靡計自木邦宋賽以至猛弄一路摧破賊
壘擊敗醜徒一一力爭勝勢亦已宣示中外莫不共見共聞惟明
瑞初議欲令額勒登額分道督兵前進一節朕早燭其委任非人
豈爲傳旨訓飭不得已特令額爾景額前往參贊以資救正迨額
爾景額在軍營病故雖非意料所及然使爾時朕若早計及一軍

整頓乏人卽令阿里表前往統率卽不能直進阿瓦亦必能應援
明瑞而木邦已得之城又何至復爲賊眾覲覲乃朕旣輕視緬匪
且以道里遠遠恐鞭長不及未卽別簡大臣往代其軍致類勒登
額節節貽誤紆道曠期甘心引賊併力於我大軍試問從來債事
失律之人有至於此極者乎此則朕不能不深自引咎者至明瑞
深入賊境鼓勵將士殲滅因糧無不自操勝算卽至小猛育之役
猶分遣偏裨率領前隊自以大營疲病之兵不忍輕棄乃身爲殿
後擁衛全軍且行且戰迫乎屢冒鋒鏑履險如夷遂不惜捐軀臨
陣蓋其秉志堅貞先有自誓百折不回者否則文員在軍如錢受
穀馮光熊等尙皆隨隊旋歸並無撓阻况以將軍統率大眾更何
難回至宛頂哉又如明瑞所領兵眾爲數萬餘數月經歷瘴鄉處
處衝突接仗今合計次第撤回者所失乃不過十分之一二可見

前此罕入以來我兵奮擊連勝並不至大有損傷特緬酋以不足
比數之汙裸而失我爲國勤事之蓋臣爲重可軫悼耳若額勒登
額之罪大惡極迥非情理所應有但其素行卽甚無良敢於悍然
不顧亦何至冥心決裂竟出於此朕細思或由比年來西域大奏
膚功國家勢當全盛而朕持盈保泰之心猶有操持未至是以
天心仁愛於席豐履順時默示以滿損之儆耶朕於此又不敢不
倍增寅畏矣見在阿里衮舒赫德已先後抵滇與督撫鄂爾明德
會同熟計俟京兵陸續會集將戢邊進剿機宜詳籌定議外所有
此次軍行始末及朕前後辦理不肯委過臣下之本懷明切宣諭
俾眾共知之○諭額勒登額所犯之罪甚重情殊可惡著將伊女
交刑部監禁其已嫁者令其離異查抄家產亦交刑部監禁○以
景福張若淮俱爲左副都御史

景福由大理寺卿張若淮由通政使遷

○丁卯諭軍

機大臣等前據阿里袞奏九龍江外見有賊匪滋擾當經降旨阿里袞等俟秋冬瘴退時酌量機宜將普洱以外零星賊匪先期剿滅今據阿里袞奏到據該處鎮將等稟報有探事兵目路遇自賊營逃回夷人詢係眼見莽子約有三四百人其餘是猛勇整欠猛迭蠻扭蠻累擺夷共有八九百人聽得說官兵很多伊等傷損二百餘人連夜逃往猛混等語猛混距九龍江不遠豈可令賊匪在彼盤踞且此等烏合人眾屢在土司邊界敢於侵擾若不大示懲創恐伊等玩視肆行罔知畏懼至此輩係召散餘黨其勢必與緬賊狼狽爲奸縱令近邊侵軼是又當先翦其羽翼以壯我聲威計京兵前後赴滇者幾及六千餘人又有安西新選之厄魯特兵皆係得力之人征勦緬匪今年已暫緩進兵若集我勁旅以除么腐小醜自非難事阿里袞可遵照前旨至期統兵前往相機妥辦至

整欠土司以先擇久經內附且爲土司中出力之人伊見在何往
何以整欠獯夷亦有隨賊之事其猛勇猛迭蠻狂蠻累各處前此
曾否內附有無土司管理並著阿里衮鄂爾一併查明卽速奏覆
可將此傳諭知之又諭蠻暮新街一帶聞向爲緬夷貿易處所沿
江而下並有緬夷稅口則其地交易之貨必多但彼處所恃以通
商者何物其仰給內地必欲得者何物除與中國交易外復有何
處行商往彼貨販前此騰越州等處民人往來貿易習爲常事必
能備知其詳今自用兵以來各關隘久已禁人外出新街等處是
否尙有貨市或關口閒有奸民偷越或邊外土司潛赴經商或緬
夷界外別種番夷往彼市易抑或市集改徙他處此等皆宜詢訪
而知且緬匪旣藉貨物抽稅連年貨稅不通叢爾邊夷豈能不稍
形缺乏各土司等詎竟茫無見聞似亦無難廣爲體察得其底裏

此皆督撫等所當隨時留心探察據實奏聞者再近邊各土司素以耕種爲業去歲曾向彼購易米糧此次行軍後各該土境是否仍安耕作今歲若往彼採買能否照前供應又大山土司久請內附昨明瑞至彼亦曾供饋軍糧極爲恭順前諭鄂甯酌加賞賚會否辦及該土司近日動靜若何我大兵退出後該土司會否遣人前來復申前說其木邦土司喪團見在作何下落俱未見阿里衮等奏及著傳諭阿里衮鄂甯將以上各情形逐一確查卽行切實覆奏尋奏查緬夷仰給內地者銅鐵鑼鍋綉段氈布藝器煙茶等物至黃絲絨綾之類需用尤亟彼處所產珀玉棉花牙角鹽魚爲內地商民所取資往來俱有稅口自用兵以來槩行禁止臣等嚴加防範商民俱不敢偷越至該土司等或有潛往商販亦所不免自新街壘著一帶經兵火後已成廢墟近亦無人到彼惟緬夷地

界荒裔或通海洋或通西藏番夷貿易自必尙有市肆但內地貨
販久經斷絕緬夷必不能不形缺乏至近邊土司每歲秋成俱有
餘糧足供採買今歲又雨澤應時可望豐收必敷購買其大山土
司前據差探木邦消息之姚闊海等回稱我兵撤回後緬賊將大
山寨子殘毀該土司兄弟俱無下落報聞○命良卿仍留貴州巡
撫任調錢度爲廣東巡撫○戊辰吏部議准江蘇巡撫明德奏通
州向有海門縣明季裁歸通州管轄見因屢漲沙洲其東南與崇
明接壤兩處居民爭搶沙地通州崇明均礙難斷理應將蘇州海
防同知裁改海門同知移設沙洲適中之地凡通州崇明新漲各
沙歸併海門同知管理原設通州沙務州同卽裁崇明縣原設半
洋巡檢移駐豹獵鎮從之○壬申 御試翰林詹事等官擢吳省
欽等三員爲一等試由部院入翰林等官擢巴彥學爲一等餘各

升黜留館有差○丙子諭朕前以譚五格之罪視額勒登額較輕因降旨將伊提京審訊再行治罪昨據阿里衮奏稱譚五格曾與額勒登額商議欲由騰越州行走是譚五格顯係畏縮不前欲回內地情殊可惡譚五格之子亦著拏交刑部監禁○舒赫德鄂甯奏查訪宮裏雁之妻子詢問久住孟良地方之郭榮禮周通等並稱宮裏雁之妻囊占其子小宮裏雁自乾隆二十七年焚燒孟連後居住孟良之景良壩後因莽匪蹂躪孟良移住三島山外之猛叭山三十年囊占帶領頭目百十餘戶赴孟良華總兵營投誠三十二年緬匪竄入孟良囊占仍奔回猛叭山又稱囊占已嫁鬼家遂凍四臘其子仍稱宮裏雁等語是其人尙在邊外得旨另有旨諭諭軍機大臣等舒赫德鄂甯等另摺所奏招撫宮裏雁之妻囊占一事亦可不必聞普洱邊外賊氛侵擾土司地界時卽有鬼家

黨羽在內果爾自不便輕宥且此等殘敗餘孽本屬不成事體而
其與緬匪是合是分亦難輕信此時無庸招撫俟秋閒應辦猛混
等處賊匪時一併隨宜籌辦將此傳諭阿里衮等知之○丁丑諭
軍機大臣等昨舒赫德鄂甯密陳情形一摺所見大謬已傳旨申
飭矣征勦緬匪一事朕初未嘗有必辦之心因楊應琚措置乖方
其勢出於不得不辦然見在相機籌辦其地路險瘴重不得不審
慎爲之原非必欲殲渠搗穴爲勞師勤遠之策舒赫德在朕前皆
所習聞何以一經赴滇竟茫然不省若此卽如辦理糧馬該省情
形未免拮据朕於新正閱鄂甯摺早已鑒悉卽降旨詢問且令鄂
甯來京面商一切舒赫德在京同軍機大臣無日不備聆訓旨豈
滇省辦理棘手之處朕尙未周知而必待伊等張皇其詞妄爲恐
嚇耶至所云每京兵千名需馬三千九百此亦拘泥成例而言若

因時制宜自當通融酌量况前此西北兩路用兵五年之內成此大功亦未嘗必需十萬之馬舒赫德在軍營甯不知之又如康熙年間征勦吳逆未嘗不用兵滇黔若必如此措置周章則吳逆尙不知若何猖獗又安能剋期翦滅耶至欲設法招致緬匪一節尤爲荒唐無恥可鄙可怪緬匪僻在荒徼卽果難於進勦亦何妨降旨撤兵尙屬光明正大之舉特以國體所關勢難中輟此時原可從容經畫以俟機會卽彼有乞降之信尙當加之駁斥不宜輕許屢經傳旨甚明伊等豈得諉爲不知且舒赫德前此聞楊應琚受莽聶眇遮之降有進獻鹽魚等語方且以爲非笑卽起程前朕慮其偏於苟且完事舒赫德自以更厯已久斷不致復蹈前轍爲奏乃一離朕前竟爾自相刺謬實在情理之外獨不思緬匪專以詐降爲長技彼自來尙當拒絕豈有轉授意招之使來是其可笑並

出進獻鹽魚下矣至摺內稱鄂甯在永昌時卽與錢度商酌招致之事其見幾與綠營粉飾陋習無異大學士鄂爾泰之子不應若此且鄂甯與明瑞同任此事明瑞勤事捐軀始將伊擢用總督伊甯不動於心思欲殄仇雪忿顧忍付之漠然且甘爲不惜顏面急圖草率完事耶今年旣暫緩進兵請事正可從長籌度有何迫不及待遽爲此自欺欺人之事此必舒赫德目擊沿途接辦兵差彼又兼程勞頓迷爾氣餒鄂甯亦因承辦軍需不無竭蹶卽欲藉此息肩是以一見投合不自知其謬妄二人俱委任軍務而庸猥至於此極獨不捫心自問天良耶舒赫德鄂甯著再傳旨嚴行申飭至舒赫德奉差原因滇兵惟怯不堪動輒退避逃散必須大加整頓是以令伊前往專任此事俟京兵到日卽會同阿里衮鄂甯悉心查辦以示懲創繼復降旨以京兵抵滇或尙需時則俟鄂甯陞

見回滇再辦今伊二人既有旨令其卽速來京此事如尙未辦及不妨暫緩之處竟待鄂甯將來回任再行妥辦著將此並諭阿里衮明德知之○戊寅諭昨舒赫德鄂甯奏密陳籌辦情形一摺甚屬乖謬可鄙可笑已傳旨嚴飭今日將原摺令王大臣等閱看內如計算進兵馬匹一事拘泥成數每兵千名應馬三千九百通計需馬十萬餘匹其說甚誕兵丁給馬自應隨宜調度使必膠柱鼓瑟勢將跬步難行試問前者平定準夷回部豈此么膺可比然用馬何嘗至如許之多卽康熙年間征勦吳逆滇黔一帶未始不調集兵眾亦不聞辦馬竭蹶若此滇省籌辦糧馬原不無少有拮据朕新正閱鄂甯奏摺卽已洞鑒所以密諭舒赫德往辦此事並屢諭該督撫從長計議乃舒赫德一到滇省未見面目卽張皇其詞恣忙入告有似滇省之事朕總不知藉彼奏而朕始悉其端委者

然有是理乎至摺內稱設法招致緬匪投誠所見尤屬荒唐無恥
迥非情理所應有進勦緬匪一事朕初無必欲辦理之意屢降諭
旨甚明因楊應琚措置乖張其勢難以中止遂令明瑞往蒞其事
明瑞統兵深入督率將士奮勇攻堅自蠻結一路連摧賊砦殲賊
因糧確操勝算卽由宋賽整軍前進直至小猛育轉戰幾數千里
凡遇賊眾無不擊斬披靡所統萬人皆不至大有損傷獨以額勒
登額逗遛債事屢促赴援喪心不顧以致賊匪轉由猛卯抄出前
路窺伺大營時明瑞猶於猛腊坡前駐紮兵勢尙整因營中間有
疲病兵丁不忍輕棄遂遣偏裨按隊先行自率扎拉豐阿觀音保
等殿後擁護使明瑞等彼時亦欲取道而出則統率全軍同回宛
頂亦復何難卽如錢受穀馮光熊等以文職漢人從軍尙且旋歸
無阻何況將軍蓋其秉志堅貞豫存不肯中道輕還之意是以親

昌鋒鎬南爲臨陣捐軀其實聚計陸續回營弁士所損不過十之一二此軍行實在情事莫不共見共聞至見在籌辦機宜原欲從長審慎並無急於堵穴殲渠之計第將軍參贊旣勤事效節義難置之不問而國體所繫應行應止亦當隨時制宜如機有可乘則整兵繕邊厚集繼進無妨稍需時日設以其地險瘴重不值勞師勤遠而明瑞在軍營所有經歷形勢急難措手之處亦屬令侍衛等詳悉轉奏夫知己知彼爲自來行兵大要使將來果不必辦理朕卽明降諭旨暫行撤兵中外聞之孰不以爲光明正大若如舒赫德所奏乃漢唐宋明庸懦無能之君臣所爲我堂堂大清勢當全盛簡卒待糧殄此醜類於力有何不給而肯效掩耳盜鈴恬不爲恥耶且緬匪每以詐降爲狡獪長技楊應琚等已屢受其愚卽此時賊眾自知得罪天朝懼干申討或有遣人乞降之信尙當嚴

加拒斥責令兇酋束身歸命或遣大頭目齎表輸忱庶可允其代
奏朕亦屢經諭及並曾傳諭阿里衮等舒赫德在京早熟聞之卽
起程前朕慮其偏於將就完局會面加訓誡伊亦自以更厯已久
必不敢再致荒唐爲對何一離朕前竟爾自相刺謬至是幸而當
今綱紀肅清一切皆稟承朕旨伊等欲爲此鄙謬之舉尙不敢不
先行入告朕得及時飭駁急令停止儻如前代庸懦無能之時其
臣粉飾以諉其上其君亦竟不加深詰聽其所爲有不爲賊人輕
笑者耶朝廷一舉一動皆臣民耳目所屬何所庸其粉飾况軍國
重務豈可自欺欺人設無知之徒聞有此奏疑朕授意舒赫德所
爲無論朕不肯受且朕何如主若於此等事稍有游移前此底定
西陲何以克奏膚功於二萬里之外哉舒赫德向在左右承朕指
示調度辦事尙能妥協一經奉差輒難專任此次所奏竟爾復蹈

故轍鄂甯自簡任滇撫以來諸事尙知奮勉今籌議此事又何以
前後如出兩人舒赫德鄂甯俱著交部嚴加議處並將此通諭中
外知之○諭舒赫德見在交部嚴加議處刑部尙書員缺著託庸
調補工部尙書員缺著福隆安調補阿桂著補授兵部尙書阿桂
未到之先兵部尙書事務著託恩多兼署○甲申諭額勒登額著
卽凌遲處死譚五格著卽處斬額勒登額身爲參贊大臣乃逗遛
貽誤決裂乖張僨事失機甘心引賊竇與叛逆無異經軍機大臣
會同刑部定擬將伊父雲代及親叔兄弟姪等均照大逆緣坐律
擬斬立決實屬罪所應得第本朝法制從無族誅之條雲代著從
寬免死交刑部永遠監禁其親叔及親弟姪等並著從寬發往伊
犁給與厄魯特兵丁爲奴○乙酉 上臨莫明瑞扎拉豐阿觀音
保

五月乙未諭傳爲訖奏請停止御史兼辦部務一摺向來各部司員補授御史該堂官等有奏請仍兼本部行走者雖爲熟諳部務起見但御史有稽查各部之責若仍令兼司部事不無意存瞻徇究於政體未協傳爲訖所請事屬可行嗣後司員改任御史奏請留部之處著永行停止其見在御史中兼部行走者並著撤回至摺內所奏科道輪班條奏一節所奏甚屬無謂御史職任建言遇有應行指陳彈劾之事果能據實入告朕必深爲嘉予若遽定爲輪班奏事按人限日令其虛應故事不惟剽竊浮言毛舉細故且有撰擬條陳轉相購覓不惜貽笑班聯者於政務更何裨益況前此何嘗不試行之而文具相沿毫無實際傳爲訖甯不聞之願以必不可行之說撫拾具奏耶且御史留部不便之處一二語即可明白乃得撻鷹犬猛獸等陳編謬悠之詞希冀張皇聳聽夫朕何

忍以鷹犬畜類視御史耶此緣甫經遷擢思以此博建白之名而不知其自蹈陋習自比禽獸矣雖邊省見聞淺陋然已服官有年亦何至不諳事體若此傳爲訖著傳旨申飭○諭軍機大臣等阿里袞奏稱由彼處逃出之兵丁方汝霖供稱楊重英被賊擊獲賊匪令其戴白頂乘馬帶至阿瓦城等語此次賊匪如果遣伊來呈遞文書阿里袞暫且安慰將賊之阿瓦城形迹如何賊勢如何一切詳細訊明俟得實後將楊重英卽行正法再審訊楊重英時將賊匪酋長見楊重英或起見或坐見賊匪如何動作伊如何見賊說何等話賊匪酋長係何等人在旁皆係何人有我天朝奸民否再賊匪所居房屋若何猶有款式否似我何處地方俱詳細審訊奏聞○庚子准旗丁於通州糶買餘米○甲辰阿里袞舒赫德贊奏查普洱邊外九龍江橄欖壩等處九龍江土司卽古之車里係

緬甸分支康熙年開土司刀孟桃內附屬宣慰司統轄普騰六困
整董猛旺烏得猛烏猛腊猛阿猛遮倚邦易武猛籠是爲十二土
司加以宣慰司爲十三板納自各土司內附緬甸屢屢滋擾土境
而各土司俱不爲賊用至召散本係緬甸所置孟艮土司猛孟容
之姪後謀奪伊叔之職眾夷不服共立猛孟容之子召丙爲土目
復爲召散驅逐召散遂分擾打樂九龍江等處其整欠夷人亦係
緬甸附屬前年官兵出口該夷逃竄楊應琚將隨征效力之士司
叭先捧立爲整欠土指揮眾夷又不服致整欠頭人召教召淵及
猛勇之召工等句結緬賊與叭先捧仇殺由整欠攻破猛彝追逐
叭先捧此等賊匪實與緬賊狼狽爲奸至是莽是緬在內地夷民
呼爲緬子外夷則稱莽子不過強爲分別其實各種皆爲緬賊實
屬一事統容臣等秋深瘴退後帶兵前往普洱思茅一帶確勘情

形務在剿殺以清邊境得旨另有旨諭諭軍機大臣等今日阿里
衮等奏到各摺其中多有早經傳旨詢問久應覆奏之事阿里衮
前此何以未經次第辦理直至舒赫德到彼方行彙奏看來阿里
衮於領兵頗能向前而經理事務則未能剖決明捷若舒赫德於
常行案件似所優爲而於大處又不足恃可見用人之難著傳諭
阿里衮嗣後諸事務須加意提策隨到隨辦毋致再有遲閣○丙
午命兵部奏派大員揀選各省請發參將以上人員著爲令○戊
申命廣西四川貴州採買馬匹○壬子嚴禁雲南騰越等處馬匹
偷販出境

六月丁巳朔 上詣 黑龍潭祈雨○庚申諭前據鄂爾琿覆奏自
稱誤聽舒赫德之言冒昧入告因令舒赫德明白回奏今據覆奏
則稱鄂爾琿先已密交錢度辦理自書奏摺邀同具奏等語是伊二

人所見乖謬相等舒赫德鄂甯並著交部嚴加議處又諭舒赫德著賞給都統職銜前往烏什更換永貴鄂甯俟到京日再降諭旨○阿里衮奏五月十六日據遊擊巴勒塔等由龍陵驛送貴州兵許爾功等齎緬匪乞降文書來到永昌臣等詳細根究據供許爾功劉先元楊清俱係貴州兵羅以德係雲南兵俱隨珠參贊駐紮木邦本年二月間被賊拏至阿瓦分給被拏我處官員使用聞賊匪猛毒之母不願與天朝打仗時常勸阻伊子懽駁與其屬下頭人頭人等聞大兵到來亦皆望風生畏是以商議乞降其所呈文書初意遣楊重英等齎送後因伊頭人眇旺模勸阻遂改派我等八人呈送文書因一人病死三人落後是以我等四人前來等語臣等拆看一係賊匪呈遞我大將軍文書因緬字難識經楊重英譯出漢字其大槩不過懇恩罷息干戈仍通買賣之意一係楊重

英等呈稟內稱守備程轍盧懷亮馬子健王呈瑞等於上年四月內道府銜楊重英等於本年二月內俱在木邦遭擒先後解到阿瓦詎料緬王不殺屢有投誠之議且緬國各頭目俱願投誠是以苟延至今又有內地人李萬全尹士份等貿易緬城熟悉夷情與我等宣諭我國德威極力招撫先議遣官前來後又改易是以一同留住阿瓦今具緬文專差擒來兵丁許爾功劉先元等八人齎呈祈懇如蒙允准望卽差官兵持文前來該國卽辦貨物遣令緬目同楊重英等解送前來等因今將緬匪原文三件並楊重英等譯出緬匪文書並伊等所呈文書共三件及詢問許爾功等供詞一併呈奏外竊思明瑞一隊之兵偶近阿瓦又由猛籠等處往返殺賊將及萬人復將蠻結蠻化二處賊匪痛剿賊等畏懼是以呈請投誠但賊匪如果誠心乞降理宜惜駿親來尙可代爲奏請今

惟令我兵齎來文書伊頭人一名未到緬匪狡猾難信不過力竭計窮爲此緩兵之計臣等公議此時仍當整兵前進肅清邊徼至齎文兵丁四人內擇其能指賊之地勢及知賊等情形之許爾功劉先元解送軍機處以備訊問至楊重英程轍等俱係職官被賊拏獲並不自裁苟且偷生爲賊譯文甚屬選輒無恥若經賊處送至或脫身前來卽將伊囚禁奏請從重治罪諭阿里袞奏緬匪遣回兵丁許爾功等呈送緬文祈請投誠進貢並擬斥駁文檄呈覽一摺所辦尙於事理未協前經傳諭阿里袞等以緬匪卽有悔罪乞降之事亦必該酋束身歸命或專遣大頭目齎表前來始可酌量代爲奏達今該匪曾未專遣一人僅令內地被掠兵丁齎文投獻實屬不成事體此種猥夷醜類卽用檄嚴詞指斥其迹已同於酬答於中朝體制斷斷不應出此見已傳旨阿里袞竟無庸給發

同文俟日後緬酋作何行徑再爲辦理並將原摺譯漢發鈔令中外共知之至楊重英世受國恩身爲大員被賊拘執不能捐軀致命乃復覲顏視息轉據賊情具呈軍營大臣實屬喪盡天良不得更齒人類所有楊重英之子著拏交刑部治罪其程轍盧懷亮馬子健王呈瑞等身爲守備非微末弁兵可比乃亦無恥偷生隨同具稟情罪均爲可惡所有伊等之子著一併查拏解交刑部治罪

○辛酉以周元理爲直隸按察使

山清河道遷

○乙丑諭額駙色布騰

巴勒珠爾見在患病理藩院尙書員缺著伊勒圖補授○丙寅命

內閣中書於會試薦卷內酌取硃墨各卷同朝考入選未用進士

試卷派大臣總閱錄取引見補用○丁丑諭前因鄂甯辦理軍營

糧餉諸務尙能黽勉是以賞戴孔雀翎並加恩給予內大臣銜以

示優異乃伊與舒赫德連銜所奏招降緬匪一事甚屬乖謬因交

部議處並令來京陛見再行降旨今面詢一切觀其胸中全無定見於軍行重務難以擔承所有原賞之內大臣銜著革去亦不必戴翎餘仍候朕再降諭旨○戊寅諭據張泰開奏年老患病給假調治已及三月尙未痊愈懇請解任休致等語張泰開在上書房行走有年頗著勤慎年躋八袞因病乞休著加恩賞給太子少傅禮部尙書銜准其致任回籍○己卯諭軍機大臣等前因舒赫德鄂甯具奏密陳情形一摺內有設法招致緬匪投誠之語所見荒唐乖謬降旨令伊等明白回奏嗣經奏到彼此爭執推諉益復不成事體是以將舒赫德等並交部嚴加議處今鄂甯來京朕面加詢問務得二人在滇如何商辦實情據鄂甯一一指出內有舒赫德自稱面奏若該匪有幾分投降光景奴才等裝點幾分還可以使得及稱朕之言鄂甯就打發人去也使得罷了等語其言深堪

駭異尤出情理之外前命舒赫德往滇之前將軍營事宜往復商
推並慮舒赫德或意存苟且完局屢經諄切戒諭此不獨舒赫德
一人聞之卽軍機大臣等具在朕前孰不共聞之今以此二節徧
問軍機大臣無不以爲怪誕甚至有失笑者舒赫德獨何心乎在
此事久經明白宣諭且已將伊等議處原可不必再行深究但天
下無知之徒好生擬議或以朕實曾經示意舒赫德及伊具摺奏
請轉加指斥處分遂爾難於見面因令赴烏什辦事則此事竟成
莫大疑團牢不可破矣試思朕辦理庶務三十年以來卽朕有過
何難自己承當雖微末之員尙不使稍有屈抑中外莫不共見共
聞何惡於舒赫德而忍加之文致耶然其言駭異若此而不徹底
明究則直欲歸曲於朕朕豈肯受耶著將鄂爾甯自書清單鈔寄舒
赫德令其速行據實覆奏見在有旨詢問阿里衮自必直陳不能

代爲解釋舒赫德如尙存迴護掩覆之見希冀顧頌了事則是重
取罪戾不能曲爲之貸也○辛巳諭軍機大臣等據彰寶等奏查
辦兩淮節年提引一案歷任鹽政等均有營私侵蝕等弊實出情
理之外已降旨將普福高恒革職運使趙之璧暫行解任該商等
革去職銜並傳諭富尼漢傳旨將原任運使盧見曾革去職銜派
員解赴揚州併案質訊矣該商等藉稱辦公名色以提引應交官
帑冒稱樂輸報效濫邀褒獎又將支用所餘應輸運庫之項亦乾
沒不交其情甚屬可惡理應徹底查辦示以懲創著傳諭彰寶等
卽速按款查究除摺內所稱綱引應交官帑各商未繳餘利六百
數十餘萬兩並該商等代鹽政等一切國濫支銷應行追出歸公
之項自應按數查辦外至歷任鹽政等如此任意侵肥審明有應
著追之項如力不能完亦應於商人等名下按數分賠再該鹽政

等在任日久其中必有留寄兩淮等處令商人生息漁利情事該商等卽應一一供明和盤托出如此時稍有含糊將來一經發覺亦惟該商等是問並著彰寶曉諭各該商前此意謂伊等勉力自效卽加之優獎今假公濟私恣意肥橐卽應照款著賠示儆國家賞罰一秉至公初無成見該撫等仍將本案嚴查確訊詳悉據實具奏並將此傳諭尤拔世知之○以范時綬爲左都御史由都統運○壬午諭前因舒赫德鄂甯妄奏招致緬匪投降一事經部議處革職降旨俟鄂甯到京再降諭旨今詳詢鄂甯此事尙由聽信舒赫德之言不能力爲主持所致而鄂甯之最難辭咎者則在前此屢檄額勒登額進援不應而不身赴軍營督辦也在額勒登額乖張決裂其事本非意料所及但鄂甯以滿洲總督且係大學士鄂爾泰之子目擊大軍深入而援師又任催罔應卽親赴旱塔一路自

行部勒額勒登額之兵相機策應朕方嘉其能知緩急機宜深得大臣之體豈有轉以專擅奪軍責備鄂甯之理乃不知出此而惟以難離永昌藉口試問鄂甯果能統眾直進則身當賊人前路賊何由繞道窺伺永昌設云賊眾甚張其勢竟可逼近內境則鄂甯雖株守永昌於事亦復何益此事理所易曉非委畀封疆重任者所當立圖自效者乎今雖事屬既往而其原委不可不明白宣示以訓將來之封疆大臣也鄂甯既於籌畫軍務不能確有所見已降旨革去內大臣所有雲貴總督事務亦難望其勝任第念伊前在湖北等省於內地巡撫事務尙能阻勉辦理鄂甯著降補福建巡撫其革職之案帶於新任十年無過方准開復雲貴總督員缺著阿桂補授至良卿前有旨仍任貴州巡撫鍾音亦著仍留廣東巡撫之任錢度著補授廣西巡撫鄂賈著來京以待即用○諭作

據彭寶等查奏兩淮豫行提引一案歷任鹽政運使等營私侵蝕情弊甚大已降旨分別革職解任令該撫等徹底查審具奏但思從來總督有稽查鹽政之責伊等如此恣意妄爲甯竟毫無聞見尹繼善久任江南何以視同局外不行據實參奏至高晉與高恆更非尋常同官可比乃伊弟簠簋不飭若是而甘心緘默隱忍尤不得辭其咎均著交部嚴加議處

東華續錄

乾隆六十八

臣王先謙敬編

臣周瀚蕃恭校

秋七月丁亥諭軍機大臣等去秋李侍堯奏聞暹羅於前歲卽與花肚番構兵被花肚番將城攻破該國王逃竄無蹤見令遊擊許全查探虛實等語其探問如何至今未據覆奏近又聞暹羅卽爲緬賊所併昨緬賊遞與將軍文內亦有管理暹羅之語是花肚番卽係緬賊所屬因疆土毗連肆其吞噬亦未可知但此時暹羅或偶被侵陵或竟爲緬匪蠶食尙無確信粵東罽門等處尙爲外番貿易之所該國商船來往必多著傳諭李侍堯留心察訪該商內曉事之人詢問該國近日實在情形該國王見在何處及暹羅至緬甸水程若干陸程若干遠近險易若何逐一詳悉諮詢如能約

略繪圖得其大槩亦可存備參酌目下並非必欲由海道捷取爲此迂闊之計且輕動舟師經越外洋恐島外遠夷妄生疑畏自於事無濟若該國王尙有志於恢復心存釋怨而力不能支欲求助天朝發兵策應是即可乘之機未嘗不可酌調水師前往攸助以期一舉兩得但其事當出之密慎辦與不辦尙在未定李侍堯止宜善爲詢訪密之又密切不可稍露圭角致涉張皇仍將詢得情由卽速據實奏聞○禁哈薩克等轉販俄羅斯貨物於內地貿易○戊子轉劉星煒爲工部左侍郎以曹秀先爲工部右侍郎由內閣學士○庚寅停止伊犁卓異及年滿人員咨部引見○辛卯以佛德爲江西按察使革任河南布政使○癸巳 上奉 皇太后啓鑾秋獮木蘭○免經過地方本年額賦十分之三○甲午調託庸爲兵部尙書以官保爲刑部尙書○乙未諭據劉統勳等奏查辦兩淮鹽引

一案盧見曾先得信息藏匿貨財訊問伊孫盧蔭恩據供係伊戚
紀昀先告知兩淮鹽務有小菜銀兩一事見在查辦伊卽於六月
十四日差家人送信回家後見郎中王昶談及王昶告伊並非小
菜銀兩乃係歷年提引事發隨又雇人送信回家嗣復見刑部司
員黃駿昌傳說高恆見已查抄家產伊叔盧謨心懼隨於六月二
十七日起身回家等語所有漏洩此案情節之紀昀王昶黃駿昌
均著革職交劉統勳等分別嚴審具奏○己亥 上奉 皇太后
駐蹕避暑山莊○嚴定州縣官疏脫重犯處分○辛丑以伊勒圖
爲伊犁將軍仍兼理藩院尙書○以德福爲湖北按察使由員外郎遷
○甲辰諭軍機大臣等據彰寶等奏查訊兩淮提引一案辦理尙
未詳盡如所稱各鹽政雖俱在任年久細加查察尙無留寄商人
生息餘利銀兩究詰各商仍無出首似不敢欺瞞等語所見非是

高恆普福在兩淮鹽政任內歷年俱久今查高恆家產幾值數十萬一應精麤什物具存且其平昔費用奢侈覈其見存資產不甚相懸似此外不應更有隱飾若普福家當查辦時所存貲財無幾而京城卽查有寄代營運之事則其在任時豫爲寄頓地步斷不能免伊用度遠不及高恆且以每年所得養廉計之爲數亦復不少何至其家竟空諸所有乃彰寶等竟謂其並無留寄朕實所不信至引盧見曾楊重英名下查出隱寄累累卽指爲各商不敢他有隱瞞之證尤爲舛謬盧見曾一案由東省據供交查楊重英一案由該旗奏聞飭辦該商等知其無從抵賴不敢不據實承認並非伊等先期自行首報也今普福查出財產旣屬寥寥而其往時又無多花用所積歷年廉俸何所歸著彼與各商交結甚久豈有不託商家代爲封殖而其今年調任之後心存疑畏又豈能不向

兩淮巧爲安頓乎商人等特因未有指實故不肯矢口輕承或念
普福多分提引舊情不肯和盤托出彰實等豈可聽其一二支飾
之詞遂據以爲實然乎著傳諭彰實等卽提各商到案詳悉開導
逐層研詰務令供吐實情水落石出不得任其含混抵飾如各商
執迷不悟其事豈能終不敗露將來別經發覺則是各商自取重
罪卽該撫等亦不能辭其咎也至餘引無著銀三百九十六萬餘
兩其中雖有代高恆普福盧見曾墊辦器物之項亦係各商等有
意結納巧於趨奉且浮冒價值仍係各商侵蝕所致所有此項無
著銀兩將來無可追抵仍應於該商等名下追還同一應行人官
之項何必爲普福狡展隱匿甘心代人任過耶各商等前於屢次
南巡承辦陳設諸事彼時因念伊等出力急公故稠疊厚加恩賚
孰知伊等卽以官窩正款冒認己貲既邀頂帶優榮又復坐獲厚

利且因並無稽查任意浮開妄費如此存心天良何在今案情自行發露實屬天理難容朕從寬不加伊等罪譴已屬逾格施恩今止令其歸還款項於情理既屬當然而眾力亦非不給可將此剴切諭商眾知之至盧見曾令商人辦買古玩未給價銀至一萬六千餘兩之多可見其上下串通分肥侵蝕俟解到揚州時一併嚴審究擬具奏其解任運使趙之璧既訊無染指情弊姑免深求但伊在任目擊鹽政如此妄行不能阻止及據實入奏自有應得處分俟此案審結照例查辦可耳○乙巳除廣東香山縣鴉鵲萌仔等圍鹽課改種稻田○己酉劉統勳等奏審訊盧見曾寄頓貲財一案先後究出向與盧見曾認爲師生之候補中書徐步雲伊戚翰林院侍讀學士紀昀並軍機處行走中書趙文哲軍機處行走郎中王昶漏洩通信應照例擬徒其刑部郎中黃駿昌信口傳說

業經革職應毋庸議得旨徐步雲與盧見曾認爲師生遇此等緊要案件敢於私通信息以致盧見曾豫行寄頓甚屬可惡著發往伊犁效力贖罪紀昀瞻顧親情擅行通信情罪亦重著發往烏魯木齊效力贖罪餘依議○辛亥兵部議奏都統職銜烏什辦事大臣舒赫德前辦理緬匪一事輒以設法招致投誠具摺密奏甚屬乖謬續經舒赫德自請從重治罪奉旨交部嚴議應將舒赫德革去都統職銜並雲騎尉世職得旨舒赫德著革去雲騎尉世職暫留都統職銜俟伊回京之日交該部提奏

八月丁卯諭瑚圖靈阿等奏恰克圖通商一事業將理藩院議定十三條行知俄羅斯廓密薩爾廓密薩爾一一欽遵辦理等語俄羅斯既知道照章程著准其通商其由內地前往貿易人等交理藩院辦理遣往○辛未 上自避暑山莊巡幸木蘭行圍○壬申

諭方觀承老成歷練任直隸總督兼理河務二十年來奉職恪勤
方資倚任昨該督至石槽迎鑾見其病後氣弱卽令回任安心靜
養繼因其患瘧增劇特賜經驗藥丸並遣醫診視以冀速痊今聞
溘逝朕心深爲軫惜所有應得卹典該部察例具奏尋予祭葬諡
敏恪○以楊廷璋爲直隸總督調裘曰修爲刑部尙書以蔡新爲
工部尙書張若淮爲刑部右侍郎由左副都御史遷○甲戌諭軍機大臣
等李侍堯奏暹羅國情形各摺朕初閱其奏聞該國貢使丕雅嵩
統呵浦回船至粵詢問暹羅殘破一事所言殊未明晰又另摺稱
遊擊許全奉差在洋患病身故之處亦恐非確情隨於摺內批示
及閱至查明覆奏一摺並麥森呈稟莫士麟呈文其事敘述已明
許全之死亦無疑義而欲將甘恩敕請封原文擲還嚴飭來人陳
美之處所見甚是但辦理尙未能盡合甘恩敕本係內地微賤之

人飄流海徼爲其夷目與暹羅國王誼屬君臣今彼國破主亡乃敢乘其危亂不復顧念故主恩誼求其後裔復國報仇輒思自立並欲妄希封敕以爲雄長左券實爲越理犯分之事若僅將原文擲還或來人陳美回國時不將該督嚴飭之語逐一轉告無以儆服外邦自應給以回文申明大義俾知天朝禮教廣被褒貶一秉大公此等負恩僭竊之人必不肯稍爲假借庶奸回有所儆懼而島夷共懷德威但恐該督處措詞未能盡協因命軍機大臣代擬諭彙寄交李侍堯按式行文付陳美齎回諭示其河仙鎮目莫士麟旣將該國形勢繪圖呈送而暹羅王之孫逃居該境又爲安頓留養頗知禮義亦應諭以數行稍示嘉獎已一併令軍機大臣擬就寄發至前諭令查訪暹羅情形如彼有志恢復欲求中國援助或可酌調水師以期一舉兩得原屬備而不用之說今暹羅旣遭

花肚番侵掠難夷口食不充其所屬祿坤等三府又與甘恩敕稱
兵內訌勢已孱弱無餘自顧且不暇又安能復圖釋怨匪番所有
取道海洋一說竟可不復置議將此傳諭李侍堯知之外寄軍機
大臣代擬李侍堯諭彙二諭暹羅國夷目甘恩敕曰爾遣陳美來
粵齎投該夷目呈文懇請 天朝封敕於理不順暹羅國王越在
海嶠世供職貢 大皇帝嘉其恭順歷賜褒封今游被花肚番侵
擾焚掠國破身亡爾既爲其夷目誼屬君臣目擊爾主遭此鞠凶
卽應堅秉忠貞志圖恢復以期殄仇雪恥卽或因殘破之後夷眾
流離艱食孱弱不支勢難驟振卽當求爾主族裔扶戴復國以續
爾故主宗祧則暹羅眾僚目孰不推爾匡翊忠勳共相欽服卽爾
嗣王繼立奏告 天朝自必敘爾功績 大皇帝聞之亦必深爲
嘉予况聞爾與烏肚汶仔婆麻勦殺得勝又入山披尋象牙犀角

等物給贖難民是爾之才幹頗爲可取。爾主庶兄詔王吉孫詔
萃詔世昌見皆避難潛居境內爾不思與眾頭目擇立擁戴垂名
不朽乃竟乘其危亂鳴張自立並欲妄希封號僭竊稱王似此干
名犯分蔑禮負恩不祥孰大反之於心豈能自安且爾本係內地
民人必知大義豈不聞中國名教於亂臣賊子不少假借乎卽爲
爾計彼世祿祿坤高烈三府因爾欲雄長其地共切同仇與爾稱
兵相拒彼則名正言順爾則逆理悖倫天道助順惡逆勝負之勢
較然豈可自貽伊戚乎 大皇帝撫有夷夏惟以仁育義正表率
萬方如爾所陳情節深乖法紀不可以據詞入告仍擲交陳美齋
還本部堂典守封疆職在宣布中朝德化矜爾愚迷特爲剴切申
諭爾如翻然改悔效忠爾主仰體 聖朝興滅繼絕之經自可永
受 大皇帝無疆福庇慎毋怙終自誤特諭又諭河仙鎮目莫士

麟曰爾僻處海疆心知向化因聞 天朝查訊暹羅情事卽將海
外各夷地形勢繪圖具文差夷官林義等齎投甚屬恭順業經據
情奏聞 大皇帝鑒爾之誠深爲優獎又聞爾於暹羅國王之孫
詔萃逃入境內卽爲安養資生頗知禮義亦屬可嘉今特給爾回
文並賞段匹用示恩意爾其敬承之特諭○己卯諭內外大臣中
有奉職恪勤及敷歷宣勞者宜晉宮銜以示優眷吏部尙書託恩
多戶部尙書于敏中閩浙總督崔應階俱加太子太保兵部尙書
託庸直隸總督楊廷璋俱加太子少保○乙酉刑部議准江蘇巡
撫彰寶奏原任兩淮鹽運使盧見曾隱匿提引銀兩私行營運寄
頓照例擬絞監候秋後處決從之

九月己丑以蔣元益爲左副都御史

由順天府尹遷

○甲午移建江西

上泗港石閘於王字湖口○乙未

上駐蹕避暑山莊○改雲南

雲南武定二府歸糧道管理○戊戌軍機大臣刑部議奏原任兩淮鹽政高恆普福侵蝕鹽引餘息高恆收受銀三萬二千兩普福私銷銀一萬八千八百餘兩均應照例擬斬監候秋後處決顧夢懷包攬漁利應依律擬絞監候秋後處決從之○己亥諭前日內閣進呈奉天秋審本內有夾片稱徐大等五案俱九卿改爲情實朕以奉天案件自係朝銓審擬伊久任盛京刑部非不諳曉律例何以寬縱至此是以降旨將伊交部嚴加議處及昨日細閱招冊內則惟徐大一案係朝銓定擬其咎當阿一案乃係黑龍江將軍富僧阿所審而馬大薛三伊勒圖三案均係吉林將軍恆祿承審之事是朝銓僅止一案尙不至於交議使彼不敢陳辨甘受處分旣不免於屈抑若據實奏明情節其將何以答之朝銓毋庸議處其恆祿所擬各案經九卿改入情實者至三起之多殊屬意存輕

縱著將恆祿交部議處庶足以昭平允至大學士傅恆等進呈閣
本尙可云未及細檢招冊而劉統勳則係承辦秋審之本部各省
冊案皆所閱定且見在熱河所奉諭旨皆同書呈覽何以並不據
實奏聞應將劉統勳交部議處彼在朕前實亦心悅誠服朕辦理
庶政一秉至公卽有檢閱未周之事所賴大臣等查明覆奏何難
隨時改正朕不執意文過也卽如進秋審本時見部駁奉天多案
卽降旨將朝銓議處及親閱招冊知非其罪卽爲開釋並不憚於
反汗亦並無絲毫成心朕於大臣等尙時加訓勉不令文過飾非
若稍存迴護之見其何以風示臣工耶將此通諭知之○辛丑

上奉

皇太后自避暑山莊回鑾○壬寅以梁國治爲江甯布政

使王太岳爲湖南按察使

由陝西糧道遷

○甲辰吏部議覆湖北巡撫程

懋奏武昌黃州二府屬江面盜竊之案向歸各州縣承緝嗣改設

武黃同知將沿江之黃岡蘄州廣濟蘄水黃梅大冶武昌興國等
八州縣捕務均歸管轄查所轄江面六百四十餘里該同知駐紮
廣濟呈報踏勘往返需時請仍歸各州縣就近查報承緝同知統
爲督催等語應如所請該同知既專司捕務除督催外仍一體偵
緝逾限不獲與州縣一例處分從之○丁未 上奉 皇太后還
京師○戊申諭據高晉等奏洪澤湖水於九月十四日加長分注
運河夜閒因東北風大致將裏河南岸王家田頭迤上之隄工漫
決十五丈見在搶築工竣等語已於摺內批飭矣洪湖於九月閒
水旣加長至在在盈隄拍岸如能及時展拓清口使宣洩通暢亦
何至有漫溢之事前於七月閒高晉等奏本年清水未長東西壩
口門戶未經拆展一摺卽諭伊等以前此南巡時令視五壩水誌
開清口以洩尾閭原專爲洪湖異漲而設如果黃強清弱自當收

縮清口以爲抵禦將來洪水或復長發則又當按度情形再行展拓此等消息機宜差之毫釐謬以千里全賴河臣隨時籌酌悉心妥辦朕豈能一一料及豫爲指示於千里之外而爲河臣者又豈可膠柱鼓瑟必待朕指授機宜方爲辦理前降諭旨甚明高晉等覆奏亦自稱此後當時時籌度不敢稍誤何以當此清水驟長之時竟不豫籌妥辦所司何事高晉李宏著交部嚴加議處其該管道府及文武員弁俱著交部察議具奏○己酉諭前因匪犯偷割髮辮一事傳諭各該督撫率屬悉心緝捕務盡根株此事蔓延山東直隸各省而江浙實爲先發覺之地爲大吏者果能一有見聞卽行嚴督地方有司實力擒拏自可得其端緒正犯不致漏網乃始則因循貽誤不卽據實入告希冀化有爲無及朕嚴切訓諭始行飭屬查辦雖據山東安徽江浙各有所獲朕恐其中有刑求屈

抑者因命提犯解京質訊經軍機大臣會同刑部步軍統領衙門
詳悉研鞫則供詞多涉游移並有畏刑屈指者可見各該省隱瞞
於前復又塞責於後而實在首惡究屬未得徒使差役四出滋擾
閭閻於政體殊未允協此案見在竟可無庸查辦其江浙兩省養
癰貽患之督撫有司不可不明示懲創以飭吏治高晉明德彰寶
馮鈐熊學鵬永德等俱著交部嚴加議處至蘇有德在江蘇最久
漸染惡派錮習尤深此案初發既不行陳奏及擢任山西巡撫該
省犯案纍纍仍復踵其故習不知悛改此豈可副封疆重任貽誤
地方蘇爾德著以按察使銜前往新疆與五訥璽更換辦事吳壇
素日辦事尙知黽勉在江蘇到任未久而督辦亦屬延緩著與浙
江前任按察使歐陽永禱見任按察使曾日理一併交部察議至
邵大業申夢璽乃屢經獲罪復用之員在江南久任方面大員號

稱能事其實薰染上和下睦之頹風素性模稜兩可謂可自居無過從不肯實心任事以致地方釀成匪案又一切置之不問其情更爲可惡俱著革職發往臺站效力贖罪所有江浙承辦緝犯旋告旋釋之州縣等官均著交與該督撫逐一查明請旨革職仍出具考語送部引見再降諭旨○以鄂寶爲山西巡撫前任廣西巡撫○庚戌停止卓異知縣升任京員引見時聲請改擢外任例○辛亥諭軍機大臣等永貴等奏據所使探信人回稱愛烏罕之兵已退素勒坦沙收復拜蘇巴特等城臣見使人前往探聽並令訪布拉呢敦子薩木薩克下落又額敏和卓見亦寄書詢問素勒坦沙等語愛烏罕之兵旣退素勒坦沙遊牧已復即可完局不必遣人探問素勒坦沙素性每欲爭奪土地此次收復遊牧後儻不知足欲請兵進取永貴等斷不可許務駁回以絕其望再布拉呢敦之子下

落亦不必訪查即使薩木薩克來至巴達克山豈能至喀什噶爾
葉爾羌乎即使能至亦無難臨時拏獲再永貴等寄書於素勒坦
沙何妨公同列名乃僅書額敏和卓者蓋恐素勒坦沙請兵難以
駁回耳此又過慮矣葉爾羌見無應辦事件永貴常駐彼處反覺
聲張著卽回烏什俟舒赫德到時交代來京○奏曰修丁憂調蔡
新爲刑部尙書以嵇璜爲工部尙書吳嗣爵署河東河道總督
蘇淮徐道署○甲寅賜哈薩克阿布賚敕諭曰前以厄魯特台吉蒙固
勒捐軀行陣聞伊弟綽諾寄居爾處因那旺查辦邊卡之便向爾
詢問爾卽將綽諾送出並派人同那旺至京朕甚嘉之今朕加恩
將綽諾承襲伊兄之職賞戴翎頂並恩准留京綽諾係爾養子爾
如思念越數年可命綽諾暫歸省視今加恩賞爾蟒段粧段各一
錦段八絲段各二爾接奉朕旨益當恭順誠切以期永沐朕恩特

諭

冬十月丙辰以伊克坦布爲戶部右侍郎○以蔣元益爲內閣學

士

由左副都御史遷

○庚申冊封慶妃陸佳氏爲 貴妃容嬪霍卓氏爲

容妃貴人鈕祜祿氏爲

順嬪

○辛酉臺灣竊賊黃教糾眾滋

事諭鄂甯等嚴飭剿捕○丁卯諭前因山西學政呂光亨失察逆

犯張廷瑞一事交吏部檢查辦過議處成案該司員等但查出馮

鈴會奉特旨從寬革職留任一案而於吳華孫李宗文等實降之

案並未查送朕知其中必有瞻徇情事令軍機大臣再行詰訊則

係姚左垣於所管廣東甲內自行檢出此案馬道周又自以值日

行文徑行封送而於各案等差俱置之不問因交都察院按例議

處該衙門輒以姚左垣等與呂光亨並無同鄉年誼僅將姚左垣

照推諉例議以降一級抵銷馬道周照不行詳查例罰俸一年夫

有同鄉年誼者必應徇庇而無同年鄉誼者自不徇庇有是理乎
姚左垣等雖與呂光亨並無同鄉年誼而所檢之案有意避重就
輕其爲徇庇更無疑義若非朕屢經指出該部或竟從輕議結姚
左垣等有不向呂光亨市恩結納者乎是伊等查案時彼此特相
喻於不言之表以爲巧於高下其手耳儻不照例議處將復何以
示儆自來官官相護之習爲害於官方政體者甚大不可不力防
其漸朕於臣工功罪輕重一切惟其自取從不豫設成見此案已
將擬議失當之都察院堂官交部嚴加議處姚左垣等均照改議
降調仍將前後緣由通諭中外知之○戊辰諭軍機大臣等據阿
里袞奏結些見與緬賊構讐當諭軍機大臣擬寫傳檄文稟發交
阿里袞等揀選妥人以將軍等之意曉諭該夷令其歸附中朝以
資驅策之用繼思此時如卽遣人往諭該夷必以中朝先有急於

招致之意徒使中持兩端游移觀望將來卽欲用之轉致不能得力見在莫如且爲停止俟該夷前來請附然後將此諭知則靜以待動尤爲適協機宜著傳諭阿里衮等目今彼處實在情形止宜不動聲色就附近一帶遴委妥人探聽確信以便隨宜應變至緬匪如有人來懇乞投順仍遵前旨相機辦理將此諭令知之○己巳命劉統勳查勘黃運兩河工程○庚午以黃登賢爲左副都御

史

由宗人府
府丞遷

○辛未諭錢度奏賀縣疏縱逃軍熊俊越獄脫逃一

案請將典史謝霖革職鞫問而於知縣鄭之琳請革職留任殊屬非是該縣監禁脫逃匪犯既不上緊辦理又不嚴密巡防致要犯晝夜免脫非尋常疏縱監犯可比自應將該縣卽行革職仍留該處協緝事理方爲允協今錢度初到粵西輒爾心存寬縱請將該縣留任使庸玩劣員仍得優游戀棧何足以示懲儆明係錢度有

意沽名沽染外省惡習不知悔改錢度著交部嚴加議處鄭之紳
著革職仍留該地方協緝嗣後有似此者均照此辦理著爲令至
改發新疆積匪猾賊在配及中途脫逃情罪甚爲可惡一經拿獲
卽應立正典刑又何必開查原案往返需時致令匪犯在獄日久
得以乘間潛逃辦理本屬未善將來各省如盤獲此等要犯訊究
明確卽行正法毋致曠時貽誤將此通諭各督撫知之又諭錢度
另摺議奏學政事宜其中所定擡送人役旱程用夫一百二十名
水程用船七隻尤屬有意沽名並非覈實辦公之道試問學政巡
歷各府卽有應帶文卷諒不過箱篋數擡已敷檢閱何至需用夫
船如許之多其意不過欲務從寬備以博學政等同官情面之歡
而不知供應紛繁勢必仍有濫索濫應之弊爲地方擾累錢度擢
任巡撫不知感恩奮勉痛自湔除外省惡習乃到任之後輒敢以

此等伎倆於朕前巧爲嘗試豈可復稱封疆之寄姑念其在滇省辦理軍需事務尙爲熟習著仍補授雲南布政使以觀後效儻再不力爲悛改則是自速罪戾不能再邀曲貸矣其廣西巡撫員缺著宮兆麟補授○己卯諭前以額勒登額有心退縮貽誤軍事富德係原保之人多方薦舉袒庇戚誼經法司按律擬斬朝審情實自屬罪所應得今句到居期凡情實各犯例應綁赴市曹候旨處決因念富德獲罪緣由究係因人連累臨時尙可不至予句富德著加恩改爲緩決○辛巳諭今日朝審官犯句到如高恆普福以鹽政大員於提引應歸官帑銀兩恣意侵漁數至累萬均屬法無可貸但普福則居心狡黠豫爲彌縫高恆則一味駭惑毫無顧忌迹異而所犯則同若於伊等稍從姑息則凡前此官犯以貪贖正法者何以示無屈枉而將來侵虧敗檢之徒將執法示儆乎抑廢

法長奸乎且前據高恆供有實係糊塗獲罪之語侵蝕帑項係何等事若亦得以糊塗自解則凡悍然飭法者又何事不可肆意妄爲耶又如達色一案初以其罪不過在短發價值與高恆普福侵貪入己者稍異及閱招冊各款有商人門禮不遂抑令不准進見之事則是示威脅眾谿壑無厭設令易河東爲兩淮其狼藉豈在二人之下是以一併予勾至通武一犯雖冒銷銀兩至七千有餘卽按例予勾彼亦何辭但其人本屬工匠出身又因造辦器具浮開侵用獲罪以物玩之微抵人於法朕亦豈肯出此又提引案內之顧蓼懷雖由慾慝高恆已亦牟利釀成大案本難曲宥第該犯乃一商賈末流近利貪財是其常情且彼卽能誘人犯法設令高恆能不聽其愚弄又安得售其伎倆是以將此二犯俱停其予勾試思朕之視高恆豈轉不如通武顧蓼懷等然情法所在差等自

有較然不可移者其海明素械阿拉克多爾濟阿拉西等所犯情節尙有一綫可原著於次年朝審一併改入緩決以昭平允慮因大典所以彰國法而正人心關係甚鉅朕於庶獄權衡銖兩惟虛衷推勘務使適輕適重各如其人情罪所自取此中裁斷一準於天道之大公非朕所能自主又豈能稍存成見意爲高下於其間哉將此通諭中外知之○壬午以素爾訥爲內閣學士

由給事中遷

○

癸未撥戶部銀四十萬兩於直隸備賑

十一月乙酉朔諭吏部兵部議處文武各員因公者照例准抵其因犯私罪者槩不准抵著爲令○丁亥諭軍機大臣等阿里衮奏據各土司探訪緬賊駕艘數十隻由新街蠻暮赴戛鳩江停泊又有賊匪由水路三四百名旱路二三千名屯駐戛鳩江又戛鳩頭目索揚帶領緬兵前來該江割會趙宏榜等又據猛固頭目金猛

等執送賊匪探信達木告稱猛卜地方尙有五六十人各等語據此情形或係緬賊不知本年暫不進兵仍似上年在老官屯腊戌等處爲防守之計耳如果屬實自應統兵進剿阿里衮等卽派曉事如長青等驍勇如海蘭察塔瑪爾等員酌帶兵二三百名直入捉生詢問賊勢相機進止務使賊匪自相驚擾以疲其力阿桂到彼與阿里衮豫籌辦理不可在彼株守坐失事機至要鳩係賊匪所屬地方若非彼中內亂何以自行搶擄而要鳩頭目又復致書內地且今歲何以不防守老官屯腊戌等處而深入要鳩屯住種種可疑阿里衮等詳悉查訪迅速奏聞○裁兩淮西亭小海二場鹽大使○壬辰諭前曾降旨令順天鄉試同考官南省人迴避南皿卷北省人迴避北皿卷邊省人迴避中皿卷滿洲漢軍迴避滿字合字卷所以防弊竇而慎掄才願行之未久旋經給事中吳煒

條奏停止此例亦遂允行今御史史猷奏請順天鄉試房考閱卷
仍應迴避所見甚是南北中皿雖總數省合編究之本籍人等或
同鄉戚友適分入本房難保無暗爲照應之事况鄉會試事同一
律會試房考閱卷旣迴避本省鄉試何獨不當迴避本籍乎取士
大典所關綦重不可不杜漸防微而遠嫌疑以助公明於考官士
子均爲有益嗣後順天鄉試並仍照乾隆六年所降諭旨行著爲
令○乙未以胡季堂爲甘肅按察使由山西冀
甯道遷○丙申召費元龍
來京以孫孝愉爲四川按察使○己亥諭修葺 文廟見屆落成
太學規模式昭輪奐惟門題殿榜尙應詳考彝章用肅景仰向來
正殿稱 先師廟二門曰廟門而大門未有書額蓋沿習明代舊
文未知釐正夫廟門之號於禮經所稱 祖廟旣涉嫌疑而 先
師廟額揭諸殿楹名實尤多未稱應於大門增 先師廟額其正

殿改爲 大成殿二門改爲 大成門庶符會典定制朕親書勝
字涓吉恭懸以彰崇道尊師之至意○癸卯命署戶部侍郎索琳
軍機處行走○乙巳諭軍機大臣等臺灣賊匪聚眾不法一案前
據該督撫等奏到各情形王巍等辦理不善之處大略可見節經
諭令吳必達妥協經理今日崔應階奏據鎮道等稟報情節一摺
是此事初發時該鎮道尙意在彌縫則平日之姑息養奸不問可
知而通覈種種原由措置尤爲失當如原報十月初二日一聞黃
教糾眾豎旗卽統率官兵剿捕今摺內稱初三日在城盤獲賊犯
劉恭等二名又續獲洪答等三十餘名鎮府旣領兵前往則城內
獲犯者何人城內旣獲如許賊犯可見匪徒結聚已久不止岡山
一處且稱黃教等豎旗聚眾原想搶奪村莊並無謀爲不軌之意
此語更爲大謬試問賊搶奪村莊非不軌而何卽此足見伊等欲

化大爲小化有爲無矣又前摺內稱王巍於初三日帶兵前赴岡山知府鄒應元隨往協辦該道張珽留郡彈壓防護是鎮道並不在一處今摺內何以稱連據鎮道具稟伊等旣行守相隔何以會合稟報或王巍往岡山後旋即回至臺灣並未親身督勦耶再摺內有第八名正犯方髓第九名正犯韓筆之語賊匪並未有散割傳帖等事何由知其次序殊不可解此語得之何人又稱賊首雖未就擒而賊眾驚惶他處賊匪難以會合此語益爲荒誕昨據鄂甯等奏賊匪蔓延北路有焚燒拒捕之事可見其並未解散今驚惶瓦解之語得自何來前後矛盾殊甚至稱挑選年力精壯熟識山徑之人改裝進山探聽賊蹤等語更非情理所有帶兵原爲勦賊况兵丁皆臺灣土著何至不識路徑另待挑人若云竄入生番兵卽不能追捕尤覺可怪臺地與生番接壤平時尙當懾以聲威

至賊匪竄入其境何難一面諭令擒獻一面統兵直入曉以勦緝
內地逸匪並不滋擾番地方爲正理乃因番境相隔卽生退阻設
使生番稍有不靖竟將置之不辦乎又王巍初二日差人齎奏雨
水情形一摺今日亦已遞到計其拜摺日期卽係黃教事發之時
該鎮何難具摺由驛速奏可以早爲指示且總兵等准其奏事原
爲地方要務起見而緊要事件並許驛函飛遞今賊匪滋事之案
地方公務孰有要於此者並非前此吳士勝馳摺謝恩可比王巍
又何拘泥若此竟不飛章渡海告之撫臣速赴郵傳耶看來該鎮
道專欲消弭隱諱故從未奏聞而節次稟揭措詞亦多粉飾殊不
知盜賊竊發原不能保其必無如漳浦縣逆犯盧茂等一案文武
各官上緊辦理妥貼朕卽加恩獎敘其出力員弁並予升賞王巍
等豈無見聞若黃教之事一有端倪卽迅速掩捕何至賊眾逸出

生事乃不此之務妄思以詭詞塞責其取戾更甚又何如先事之
據實直陳耶王巍等俟此案辦結後再降諭旨吳必達見已領兵
赴臺一切勦賊緝犯自能合宜所有已獲各犯並著交吳必達會
同余文儀迅速嚴審仍遵前旨卽行在彼正法如鎮道及在事員
弁有乖方貽誤應行究訊者卽一面令其解任一面奏聞亦無不
可仍卽將日來查辦情形星速具奏並將此傳諭崔應階鄂甯等
知之○己酉諭國學崇祀先師規制法程美備是飭我列聖
右文重道尊禮有加朕臨御之初卽詔易黃瓦儀惟其隆邇以殿
廡歲久弗葺特發帑金二十餘萬鳩庀鼎新敕大臣董厥成輪奐
視舊增益工旣告歲而門殿諸額向沾明張璠陋議非所以肅觀
瞻明折中也旣依會典定名躬爲榜書並宣諭釐正大指茲復親
製碑記具修建原委且於幾暇手書付鈐表示鄭重將以明年仲

春詣學釋奠落成之彰盛典焉遐稽闕里 廟堂有後漢時饗象
諸尊以爲觀美爰擇內府所藏周範銅鼎尊卣鬲壺簋簠爵洗
各一頒置太學陳之 大成殿中用備禮器夫孔子志在從周楹
閒列姬朝法物於義惟允所司其敬懷將事典守弗替以克副朕
意

十二月乙卯朔諭賊匪黃教糾眾不法一案該鎮王巍於九月初
一日抵臺灣卽據地方官報知其事自應刻卽親往剿捕盡獲匪
黨以淨根株乃僅派守備把總入山搜拏遷延一月致賊匪得以
肆行無忌直至十月初二日聞匪眾豎旗之事始帶兵親往昨閱
伊奏摺其觀望畏蕙情形畢露卽此一節已難勝總兵大員之任
王巍著革職俟督提等查參到日再降諭旨○丙辰諭軍機大臣
等據阿里衮等由六百里馳奏一摺詳加披覽止係尋常事件而

於如何辦賊之處仍無一語奏及甚屬非是阿里衮身爲將軍尙書兼領侍衛內大臣帶有滿兵數千在彼駐紮理宜分派巴圖魯弁兵捉生攻掠使賊匪自相驚擾久而窮蹙自來投誠豈有坐待之理顯係心懷畏葸欲圖草率了事阿里衮自京起程時看其尙屬奮勇不意到彼惟以駐守塞責而於一切布置毫不經意殊負朕恩著傳旨嚴行申飭○戶部議准御史虞鳴球奏勦田一項係前明勦臣產業散在江浙諸省其賦較別項田畝爲輕且不納漕米見在執業並非勦臣後裔而田賦科則相沿邀恩殊爲未協應敕各督撫按冊立限飭各州縣清查並令民戶首報布政司覈實一體輸將從之○己未諭前據山東省查獲蔡廷章斬貫子通果等供認割辦確鑿經朕降旨詢問該撫如何設法成招而富尼漢覆奏並未刑求到案卽行供吐及至解京後經軍機大臣會同刑

部審訊其外省所取供詞皆係承審官刑逼妄供而各犯身受刑傷種種見在尙未平復是富尼漢前次覆奏實屬捏飾已將伊交部嚴加議處又程肅奏鞏獲僧人普闊不加刑求卽自認爲割辦匪犯及河南巡撫阿思哈將普闊案內應質人犯於普闊解至該省時就近提質究出普闊向湖北都司田國恩任所尋父經田國恩妄鞏送交黃岡縣查訊該縣楊儀輒加刑訊普闊畏懼信口混供及查起辦毫無確據已傳諭將田國恩楊儀及普闊等解京審訊俟審結時再將程肅議處割辦匪犯蔓延各省擾害良民督撫等自當飭屬上緊嚴鞏但獲犯到案必須細察情由反復研訊豈得濫加刑拷累及無辜屢經傳諭各督撫極爲明晰乃各省並未獲一眞實匪犯而山東湖北二省輒將無干之人妄加鍛鍊展轉株連若非朕洞悉其情提解覆訊幾成冤獄至富尼漢始而頗

知認真繩緝程熾則因朕旨詢問始行盤獲一二游僧塞責最其
初辦情形富尼漢與程熾判然不同而以刑逼成招之案敢以不
事刑求誑奏則兩人如出一轍督撫等偶有無心之過尙可加恩
寬宥乃辦理此等重大案件公然有心欺飾且二人皆初經委任
之員竟不知以誠實自矢卽重治其罪亦所應得若僅予以革職
留任未足蔽辜而似此居心豈可復膺封疆之寄富尼漢著降補
山西布政使革職留任其山東巡撫員缺卽著富明安補授程熾
著降補江西布政使革職留任其湖北巡撫員缺卽著揆義署理
○漕運總督楊錫紱卒予祭葬諡勤愨○以梁鴻鴻署漕運總督
尹嘉銓爲山東布政使雷暢爲山東按察使服闋湖北按察使○庚申託
恩多以前署步軍統領失察步軍協尉等曠誤革職調永貴爲吏
部尙書以觀保爲禮部尙書素爾訥爲左都御史德成爲內閣學

士由給事中

○甲子定長卒調吳達善爲湖廣總督以明山爲陝甘

總督

由陝西巡撫遷

○乙丑諭軍機大臣等據阿里衮等奏派海蘭察巴

朗塔瑪龍領兵三百餘名分路前進等語阿里衮等接朕前旨派

海蘭察等帶兵捉生攻掠但爲數無多恐有疏虞計此時阿桂已

到著傳諭伊等速卽領兵策應以壯聲援又據奏自緬逃山之何

士順供稱結些帶兵三萬駐紮邊境俟大兵到時卽攻取阿瓦城

等語看來結些與緬匪構釁屬實可將本年暫不進兵之處曉示

結些令其明歲會兵協勦俟平定緬匪後卽以該處地方給令移

駐實爲妥便阿里衮等務宜相機籌辦勿誤事宜仍將海蘭察等

見在進兵情形速行奏聞○調阿思哈爲陝西巡撫以文綬爲河

南巡撫

由哈密辦事大臣遷

○戊辰諭據鄂爾琿奏臺灣道張珽於辦理逆匪

黃教一案平日旣不能率屬稽查奸宄及賊匪蔓延又復安坐郡

城並不親往督捕且一味存心諱飾捏混欺蒙請旨革職等語張珽著革職仍留臺灣令其自備資斧協拏逆匪俟事竣之日另行降旨所有臺灣道員缺緊要必須熟諳強幹之員方足以資整飭孫孝愉著以按察使銜管理臺灣道事務其四川按察使員缺著劉益補授○己巳諭軍機大臣等本日阿里衮由六百里加緊馳奏達禮善海蘭察等於南坎登拐地方各勦殺賊二三百名將糧米器械盡行燒毀一摺朕詳加披閱南坎登拐地方距邊境不及百里達禮善等並未深入賊巢輒將附近獮夷濫殺塞責此等獮夷與緬匪何涉從前珠魯訥妄殺獮夷四十餘名因而走險附賊卽前車之鑒達禮善等理應加之撫慰取其牲隻糧石以資進兵之用乃槩行殺戮並將見有糧石無故燒毀實屬不曉事體達禮善等著嚴行申飭阿里衮等於伊等同時並不嚴斥其非反以爲

功加緊奏捷亦屬非是著傳諭阿里衮等仍派達禮善海蘭察前往奮勦阿里衮亦卽多帶勁兵隨後策應如獲有糧石卽爲往來口糧勿得燒毀仍將如何辦理之處速行奏聞○癸酉諭軍機大臣等阿里衮辦理達禮善等勦收擺夷一事種種錯謬伊從前凡遇行陣頗知奮勉詎到該處惟知擁兵駐紮以戍守塞責阿桂在京時籌畫亦甚周妥行至中途卽欲釋回竊匪謀者冀圖將就了事伊等如此辦理必至貽誤機宜殊堪痛恨朕今添派索倫等兵二千名前往著傳諭阿里衮阿桂務遵節次諭旨率領進勦務使賊匪畏懼乞降尙可將功抵罪儻仍退縮株守稽延時日朕彼時另行遣員勦辦伊等能不顏厚耶此事究應作何完竣著各據所見明白回奏○庚辰諭軍機大臣等據阿里衮阿桂奏聞賊匪見在曼鳩地方派海蘭察瑪格巴朗克車德依那木扎勒豐昇額等

帶領官弁三百餘員在前隊伊等親率侍衛官弁一百餘員接應
派綠營兵五百名令哈國興長青等帶領出萬仞關遙爲聲援均
不攜帶行裝等語所辦尙屬妥協此次阿里衮等輕裝前進馬匹
口糧雖不能充足儻能多有斬獲儘可資進兵之用著傳諭阿里
衮等轉飭海蘭察等至夏鳩地方設所獲賊糧米甚多務量力進
取卽添兵續進亦無不可但大兵前進後或被賊匪從後抄襲亦
不可不豫爲之慮惟在伊等臨時籌度萬全可耳再據奏各處所
有馬三千餘匹疲瘦居多酌選四百餘匹令官弁等乘騎等語此
係經管官弁等不善飼餵所致來年進兵如何充用阿里衮等亦
宜豫期查辦並將近日辦理一切情形詳悉速奏○辛巳諭軍機
大臣等前降旨普洱一路軍務阿里衮等不能遙顧特派永瑞五
福駐紮九龍江等處令其探訪賊匪消息勦撫兼施會據奏分路

駐防而於該處情形作何辦理之處尙未覆奏見在永昌一路已諭阿里衮等酌量進兵其九龍江一帶若有緬匪潛踞或別部人有從賊者亦宜乘瘴氣未作之時速往捉生攻掠以分其勢不可株守防邊致誤機會著傳諭永瑞等速將附近九龍江等處係何項部落會否歸附緬匪之處遵旨詳訪相機妥辦仍速行具摺奏聞○壬午諭見在豫省尙有承辦軍需事務阿思哈著仍留河南巡撫之任其陝西巡撫員缺卽著文綬調補○是歲朝鮮琉球來貢